


لا أستطيع أن أفكر وأنا أرقص

إيمان عبد الله



لَا اسْتَطِيعُ أَنْ أَفَكِّرَ وَأَنَا ارْتَضَى

إحسان عبد القدوس

لا أستطيع أن أفكر وأنا أرقص

الناشر : مكتبة مصر
٢ شارع كامل صدقي "الغزالة"
سعيد جوده السحر وشركاه

دار مصر للطباعة

٣٧ شارع كامل صدقي

كلمة

هذه هي أول قصة في قالب مسرحي أجرؤ على نشرها ، ربما لأني ولدت في المسرح ، من أم وأب من أهل المسرح ، وفضيت طفولتي وصباي بين كواليس المسارح ، وتركت نشأتي في نفسى نوعا من الرهبة من الإقدام على أى عمل مسرحي رغم كثرة ما خطر على بالي من صور مسرحية ..

ولا أدري أى نوع من المسرحيات هذه التى أقدمها اليوم .. هل هي مسرحية استعراضية ، أو فكرية .. وهل هي درام أو كوميدي مضحكة .. كل ما أعلمه أن الذى حرك إحساسى بها ليس وضعا محمدا نعيش فيه ، ولكنها صورة للتاريخ كله كما يمكن أن يوحى به التاريخ . وإذا كان فيما رجته من مشاهد بعض الغرابة فهى لا تصل إلى غرابة مسرحيات بيكيت أو يونسكو أو باق كتاب المسرح الحديث أو ما يسمى اللامعقول ..

بل لا أدري .. هل هذه مسرحية ؟!

« إحسان »

المشهد الأول

(إطفاء تام في الصلاة والمسرح يستمر
دقيقتين ، وتنطلق من خلف الستار أصوات ضبط
آلات موسيقية مختلفة ما بين آلات شرقية وآلات
أجنبية ، ويرتفع معها صوت رجال سكارى ،
وهرج ..

تركر دائرة الضوء على مقدم البرنامج الواقف
أمام ستار المسرح يرتدى بدلة سموكنج
مستأجرة) .

مقدم البرنامج : والآن سيداتي وسادتي بعد كل الثمر التي شاهدتموها
طول اليوم ، نقدم لكم معجزة الزمن .. راقصة
مصر الأولى .. الفنانة الموهوبة .. الرائعة الجمال .
المياسة القد .. الخفيفة الدم .. الإنسانة الكبيرة ..

الآنسة ميمى .. (صوت تصفيق ينطلق من
خلف الستار، وضربات سريعة على الطبله
تحى اسم الراقصة) سيداتى وسادتى .. إن
كباريه الفردوس الأخضر، يفخر ويتباهى
على كل كباريهات العالم بأنه يحتكر جهود
ميمى .. نجمة عام ١٨١٥ .. آسف ..
١٩١٢ .. آسف .. أقصد عام ١٦٥٢ .. لا،
لا .. أقصد عام .. الحقيقة أنى مرتبك
شوية النهاردة .. تعبان .. حاسس انى بقالى
ميت سنة باشتغل فى الفردوس الأخضر ..
مليون سنة .. من غير نوم ولا أكل ولا
شرب .. وعلى العموم مش مهم ان ميمى
تكون نجمة عام ١٨١٥ ولا عام ٢٠٠٠
قبل الميلاد .. المهم انها نجمة ..
وأرقام السنين مالهاش معنى .. ما تدلش

على حاجة .. الزمن مش أرقام نقرأها فى
نتيجة المطبعة الأميرية ، أو تحدددها ساعتى
ماركة تيتوس .. الزمن أفكار .. الفكرة
اللى فى عقل كل واحد منا هى اللى بتحدد
الزمن اللى عاش فيه .. وعقولنا مقاسات ..
زى الجزم .. فيه عقل مقاس ١٩١٧ ..
وعقل مقاس ١٩١٩ .. وعقل مقاس
١٨٨٢ .. وعقل مقاس ١٩٥٣ .. وعقل
مقاس ٢٠٠٠ .. وعقل فرعونى مقاس
٣٠٠٠ قبل الميلاد .. وعقل أرابيسك
مقاس ٨٠ هجرية .. او عوا تكونوا فاكرين
انكم علشان قاعدين فى حطة واحدة تبقوا
عاشين فى زمن واحد .. أبدا .. ما فيش
حاجة بتجمعنا إلا المكان .. إنما الزمان ،
لا .. أبدا .. فيه اتنين هناك فى الصف
العاشر عارفهم كويس .. قاعدين جنب

بعض .. كنفهم في كتسف بعض ..
ولايسين زى بعض .. لكن بينهم وبين
بعض قرن من الزمان .. ميت سنة .. إحنا
مش عايشين فى زمن واحد .. كل واحد
فينا عايش فى زمنه .. فى فكرته .. فى
عقيدته .. ضرورى فيه فرق .. إذا ما كانش
الفرق خمسين سنة .. يبقى ستة أشهر ..
أسبوع .. يوم .. التوائم الزمنية اللي
عايشين فى يوم واحد ، ودقيقة واحدة ،
وثانية واحدة .. شىء نادر .. ويمكن شىء
مستحيل .. يبقى ما تصدقوش أرقام
السنين .. دى حاجة زى الإعلانات ،
مفروضة علينا .. زى إعلان البيسبي
كولا .. كبيرة ولذيذة .. ما حدش راح
يناقش صاحب الشركة ويقول له والله أنا
شايف انها لا كبيرة ولا لذیذة .. ما حدش

راح لشركة أومو وقال لها والله أنا رأيت أنه ما
بيغسلش أكثر بياضا .. كمان ما حدش راح
للى وضعوا أرقام السنين وقال لهم :
تسبحوا تغيروا الرقم ، أنا مش عايش فى
سنة ١٩٦٧ ، أنا عايش فى سنة ١٩٨٠ ..
ما حدش .. لأنها إعلانات .. شعارات ..
وما بنهتمش بيها .. لأن مالهاش أثر فى
حياتنا .. لا بتزود ولا بتنقص .. أنا
آسف .. عارف انى تكلمت كثير .. وأنا
دائما باتكلم كثير .. وصاحب الكباريه
غلب يطلنى كلام .. إنما أعمل ايه ..
شغلتى .. إنتاجى كله كلام .. مش عايزين
زيادة إنتاج .. يبقى عايزين منى زيادة
كلام .. والحقيقة ان أمتع حاجة فى
الفردوس الأخضر هو كتر الكلام .. أى
كلام .. لو ما كانش فيه كلام ما كنتش

اشتغلت فيه .. و كنت بقيت عاطل .. وناس
كثير من محترفي الكلام زبي كانوا اتعطلوا
وبقت حكاية .. وأزمة .. أزمة بطالة .. وأزمة
كلام ..

المهم .. أنا كنت باقول إيه .. آه ..
سيداتي وسادتي نقدم لكم الأنسة و... والله
ما انا عارف آنسة ولا سيدة .. الستات ليه
مصممين على حكاية آنسة وسيدة دي ..
حكاية بايخة .. وعيب الحاجات دي ما
يصحش يبقى لها ألقاب .. هم مش عايزين
مساواة مع الرجالة .. طيب ما فيش بين
الرجالة سيد وآنس .. ما فيش السيد على
والآنس على .. السيد وبس .. يبقى الستات
كمان ، سيدة وبس .. ما فيش السيدة ميمى
والآنسة ميمى .. فيه السيدة ميمى وبس ..
عارف انى رجعت اتكلم كثير .. وآسف مرة

تانية ..

سيداتى وساداتى . إليكم السيدة
ميمى .. نجمة عام و .. رجعتا تانى
للزمن .. كل واحد فيكم يسأل نفسه هو
عايش سنة كام .. ضرورى .. ما حدث
فيكم حايعرف ميمى تبقى نجمة سنة
كام .. إلا إذا عرف الأول هو عايش سنة كام ..
سيداتى وساداتى .. ميمى ..

(صوت الطبله يرتفع يحيى اسم
الراقصة كما هي العادة في صالات
الرقص .. وتصفيق حاد ..)

* * *

(يفتح الستار ببطء على صوت فرقة
موسيقية تعزف لحنا شرقيا راقصا ..
الفرقة الموسيقية في صدر المسرح ، وقد
ارتدى كل واحد من أفرادها زيا مختلفا ..

واحد في زي بلدى .. جلاية وطاقية ..
وواحد في زي خواجه .. وواحد في زي
شيخ .. وواحد في زي قسيس .. وواحد
في زي قرقسازى ، وواحد في زي
« كاربوى » أمريكى .. وواحد في زي
صينى .. وواحد في زي إفريقى ، وواحد
في زي عربى ..

والآلات الموسيقية التي يعزفون عليها
تمثل كل ألوان الموسيقى العالمية ..
قانون .. وساكسفون .. وأرغول ..
وطبلة أفريقية .. وستار هندى .. وبلالیکا
رومى .. و« هارب » كلاسيك .. و ..
و ..

تسلط الأضواء كلها على الفرقة
الموسيقية في صدر المسرح ، وبقية
جوانب المسرح تبقى مظلمة .. ويرتفع

منها .. من الظلام .. أصوات مختلفة :
« الله الله .. يا سيدي كده .. أطربكم
الله .. كمان والنبي شوية القانون دول » ..
فتراد ناقر الطبلية (وهي طبلية مصرية
صغيرة) يبدو أكثر العازفين حماسا ،
ويجلس في طرف الصف الأمامي من
العازفين ، ولكنه يتصرف وكأنه قائد
الفرقة الموسيقية والمسيطر عليها .. وهو
شاب ممتلئ .. في تعابير وجهه فسوة
وشراسة .. وفي عينيه ذكاء حاد .. وله
شخصية بلطجية الصالات ..

فجأة يتغير اللحن الراقص الشرقي
ويبدأ فريق من العازفين يعزفون لحنا
كلاسيكيا .. وتبدو المفاجأة على وجه
الطبال .. وترتبك الأنغام .. ولكن الطبال
يظل محتفظا بابتسامته وحماسته ،

ويحاول أن يرافق بطبلته اللحن الجديد ،
ويدو نشازا صارخا ..

وبعد قليل .. يتغير اللحن الذي تعزفه
الفرقة .. وتبدأ في عزف موسيقى جاز
« تويست » .. ويحدث الارتباك بين
الآلات الموسيقية مرة ثانية .. ويفاجأ
الطبال ، ولكنه يظل محتفظا بإتسامته
ويحاول جاهدا أن يصاحب اللحن بالنقر
على الطبله ..

وسط هذه الموسيقى المختلطة
النشاز ، لا تزال الأصوات ترتفع من
أركان المسرح المظلمة :

الله الله .. كمان يا اخواننا .. يا سلام
على الفن .. هايل .. أيوه والنبى يا سى
عبده ..

ثم يرتفع صوت فى الظلام صائحا فى

لهجة السكارى :

حيرتونا الله يحيركم ..

ويرد عليه صوت آخر فى الظلام :

اسكت يا جاهل .. أما تبقى تفهم ابقى

اتكلم .. المحل ده للى يفهموا بس ..

وتعود الأصوات تردد :

الله الله .. تعيش المفهومية ..

فؤاد الطبال يقوم من مقعده بين أفراد الفرقة

الموسيقية — بينما الفرقة مستمرة فى

العزف — ويتجه إلى طرف المسرح المظلم ..

ينقر على طبلته نقرتين ، قائلا :

صحصحوا امال يا اخوانا ..

تنطلق دائرة الضوء إلى المكان الذى يقف

فيه فؤاد الطبال وتكشف عن مائدة يجلس عليها

رجلان كل منهما ضخيم الجثة جدا ،
وليس له رأس .. يبدأ جسم كل منهما
بالكتفين .. وكل منهما بارز العضلات
كأنهما من نوع إنسان العصر الحجري ..
ينقر فؤاد الطبال نقرة واحدة على
الطبله فيضحك الرجلان في قهقهة
عالية ..

وينقر نقرة أخرى فيكف الرجلان عن
الضحك ..

ويقول فؤاد الطبال :

أيوه كده .. فرفشوا امال ..

* * *

يخطو فؤاد الطبال إلى ركن آخر من
الأركان المظلمة ، وينقر على طبلته نقرتين ،
فتطلق دائرة الضوء لتكشف عن مائدة يجلس
عليها ثلاثة رجال يرتدي كل منهم بدلة سوداء
(لا أستطيع ..)

وقميصا أسود ، ولكل منهم وجه أبيض ..
ينقر فؤاد الطيال نقرة واحدة على
طبلته فيقف الرجال الثلاثة ..

وينقر نقرة أخرى فيستديرون له .
ويدو كل منهم بعد أن يستدير وهو
يرتدى بدلة بيضاء ، وقميصا أبيض ،
ووجه أسود !

ويقول فؤاد الطيال ضاحكا :

يا بختكم ماشيين فى كل حنة .. زى
الجنية الذهب ، على كل وش مقبول !
ويضحك الرجال الثلاثة ..

وينقر فؤاد على طبلته نقرة واحدة
فيستدير الثلاثة ، ويدون بوجوههم
البيضاء ، ويضحكون أيضا ..

* * *

ويخطو فؤاد الطيال إلى ركن آخر مظلم ..
ينقر نقرتين على طبلته ، فتطلق دائرة

الضوء لتكشف عن مائدة يجلس عليها
رجلان يرتدى كل منهما عباءة عربية
وعقالا ، كلاهما في لون الذهب ومطرزة
بجنيهات ذهبية كثيرة ، ووجه كل منهما
في لون الذهب ، تطل منه لحية سوداء ..
وينقر فؤاد على طبلته نقرة واحدة
فيهتز الرجلان في جلستهما ، وينطلق من
اهتزازهما صوت شخلة النقود الذهبية ..
يصيح فؤاد :

الله .. كمان والنبى ..

وينقر مرة أخرى على طبلته ، فيهتز
الرجلان مرة أخرى ، وينطلق صوت
شخلة النقود الذهبية ..

* * *

وبذلك يصبح المسرح كنه مضاء ..

وتبدو في الركن مائدة خالية ..

يلتفت فزاد الطبال لفتة سريعة إلى
داخل كواليس المسرح ، ثم يصرع إلى
مقعده بين أفراد الفرقة الموسيقية ، الذين
ما يزالون مستمرين في عزف الألحان
المختلطة ، ويشير لهم بأن يستعدوا ..
وينقر على طبلته بحماس وقوة لينبه إلى
دخول الراقصة ، ثم تبدأ الفرقة الموسيقية
تعزف لحنا راقصا شرقيا ..
تدخل الراقصة ميمى ..
جميلة .. رشيقة .. تبدو في عينيها
الطيبة والحيرة .. وتلبس « الحجرة »
السوداء ، وتضع على أنفها برقاها أبيض
شفافا (الزى الذى كانت ترتديه المرأة
المصرية فى العشرينات) ..
ترقص ميمى بهذا الزى ..
ترتفع صرخات الإعجاب والتهليل :

يا أرض احفظى ما عليكى ..

يا كهربة من غير سد ..

الحركة بركة ..

بص .. شوف .. ميمى بتعمل إيه ..

حاسبى العسل اللى بينقط منك .

تقترب ميمى وهى ترقص من

العملاقين اللذين ليس لهما رأس ، فيقفان

ويتقدمان نحوها خطوة ، وينشدان فى

نفس واحد ، كأنهما كورس :

: احنا اللى الأسد يخاف منا .. ركناه ..

العملاقان

احنا اللى سيوف الأعادى بين صوابنا تبقى

ليان .. احنا اللى القبيلة الذرية تيجى لغاية

عندنا وتبقى غزل بنات .. احنا اللى بقوتنا

فتحنا امبراطوريات .. يهون عليكى كده يا

ميمى تسيبنا من غير ميعاد ..

: ولا حتى كلام ..

أحدهما

الثانى

: ولا سلام ..

تضحك ميمى ضحكة فاقعة ..

العملاقان

: يا لهوى .

تبتعد عنهما ميمى وتتجه نحو المائدة
التي يجلس عليها الرجلان العريان
المذهبان، وقبل أن تصل إليها.. يتغير اللحن
فجأة ، وتعزف الموسيقى لحن
« تويست » ..

تلتفت ميمى إلى الفرقة فى دهشة ..
ولكن فؤاد الطبال يخطط على طبلته فى
عنف كأنه يأمرها بأن تستمر فى الرقص ..
ترقص ميمى تويست .. فى استسلام
وهى تنظر إلى فؤاد فى جزع كأنها تخافه .
تقترب ميمى من الرجلين المذهبين
وتقف أمامهما وهى ترقص تويست ..
يقوم الرجلان ويشاركانها فى رقصة

« التويست » وتشخلل الجنيهات الذهبية

المعلقة في ثيابهما شخللة عالية ..

أحد الرجلين : (وهو يرقص) سامعه يا ميمى .. سامعه

الشخللة ..

الثانى : (وهو يرقص) شخللة الحياة .. شخللة

النعيم .. شخللة الهنا ..

يتوقف الرجلان عن الرقص ، ويتقدمان

خطوة نحو ميمى وينشدان معا فى لهجة

كورس :

الرجلان : احنا اللى الرمل فى إيدينا بقى ذهب .. احنا

اللى الجميل من تحتينا بقى كاديلاك .. احنا

اللى الخيمة نفخنا فيها بقت قصر من

مرمر .. نشترى نشترى .. نشترى ..

فلوسنا ما بتخلصش .. بطوننا ما

بتشبعش .. عيوننا ما تتمليش ..

أحدهما : اشترينا قصور ، وعطور ، وبخور ..

أحدهما

الثانى : واشترينا ألماظ ، ولولى ، وفيروز ..
أحدهما : واشترينا بنات .. سمر .. وشقر ..
وطوال .. وقصار ..

الثانى : واشترينا رجال .. عرب .. وخواجات ..
أحدهما : (فى لهجة كلام عادية) طيب والله ولا
لك على حلفان .. أنا عندى واحد
أمريكانى ..

الثانى : وأنا عندى واحد سكوتش .
الاثنان : (فى لهجة كورس) كام .. كام .. قولى
كام .. مليون .. اثنين .. بالدولار
بالاسترلىنى .. عملة صعبة ..

أحدهما : علىّ باربعة مليون ..

الثانى : خمسة ..

(ميمى تضحك ضحكة فاقعة مفتعلة ،

وتهم بالابتعاد عنهما) .

الاثنان : (فى يأس) يا حسرتاه .. يا ويلتاه .. يا

كبداء..

(يجلس الاثنان إلى مائدتهما ويكبان بصوت عال، ويخبطان على المائدة بأيديهما ويرفسان بأرجلهما في الهواء كما يفعل الأطفال عندما يكون) .

تبتعد ميمى عنهما وهي ترقص ..

تتغير الموسيقى فجأة، وتعزف الفرقة

لحن الفالس الكبير لشتراوس ..

تردد ميمى، ولكن فؤاد الطيال، ينقر

على طبلته نقرة قوية، فتخاف ميمى

وترقص «فالس» ..

تقترب ميمى وهي ترقص من المائدة

التي يجلس عليها الثلاثة الذين يرتدون ثيابا

من ناحية بيضاء ومن ناحية سوداء ..

يقف الرجال الثلاثة يواجهون ميمى

بالثياب البيضاء والوجوه السوداء ثم

يستديرون ويواجهونها بالثياب السوداء

والوجوه البيضاء ..

ثم يأخذون في تكوين تشكيلات من
أنفسهم .. أبيض على أسود .. وأسود
على أبيض .. اثنين سود وواحد أبيض ..
واثنين بيض وواحد أسود .. وهكذا ..

الثلاثة ينشدون في نفس واحد :

احنا النهار والليل .. احنا الشتاء
والصيف .. احنا الميه والنار .. احنا اليمين
واليسار ..

أحد الثلاثة في لهجة عسكرية أمره :

يمين ..

فيستدير الثلاثة في اللون الأبيض ..

ثم يصيح نفس الشخص :

يسار ..

فيستدير الثلاثة في اللون الأسود ..

ويعود يصيح :

يمين ..

فيستديرون في اللون الأبيض ..

ويصبح :

يسار

ويستديرون في اللون الأسود ..

(يتكرر النداء والاستديارة خمس مرات ،

وميمى تضحك ولا تزال ترقص) ..

: (يصفقون وينشدون في صوت واحد)

الثلاثة

الناس بتطلع وتنزل .. واحنا بنطلع بس ..

بس .. بس .. نيجي مع الجايين .. وما

نروحش مع الرايحين .. ما نروحش .. أبدا

ما نروحش .. دايمًا طالعين لفوق ..

لفوق .. لفوق .. الباب المقفول نفتحہ ..

الورقة الواقفة نجرها .. الكلمة خلوة ولا

لهاش معنى .. والخطوة خطوة لكن لا

تقدم ، ولا تأخر .. احنا الأمان .. احنا

الدوام .. احنا المسكسب .. كل

مكسب ..

(ميمى تضحك ضحكة فاقعة وتتجه

إلى وسط المسرح ..

الثلاثة يجلسون إلى مائدتهم وتتقارب

رءوسهم ويتهامسون كأنهم يتفقون على

خطة ..

تبدأ الموسيقى فجأة فى عزف لحن

شرقى راقص ..

ميمى ترقص) ..

* * *

(يدخل إلى المسرح ثلاثة رجال عواجيز

(فوق السبعين) يرتدون بدلا سوداء من

الطراز القديم ، وياقات منشية عالية ، وكل

منهم فى يده مسبحة طويلة ويحملون على

أكتافهم نعشا « خشبة ميت » .

* * *

الثلاثة : (الذين يحملون النعش في صوت واحد)

السلامو عليكم ..

(يتجهون إلى المائدة الخالية ،

ويضعون النعش على الأرض ، ويجلسون وعلى شفاهم ابتسامات بلهاء ..

يدخل الجرسون يحمل صينية من

الذهب وعليها كوس مذهبة ، وهو يصيح :

واحد طقم مذهب لشيخ العرب .

يضع الجرسون الصينية أمام شيوخ

العرب ، ثم يتجه إلى العواجيز الثلاثة :

الجرسون : في الخدمة يا زمن ولي .

العجوز (١) : أعطني كأسا مترعة من بنت العنب مشتاقة

تسعى إلى مشتاق ..

العجوز (٢) : أعطني من الصهباء وداوني بالتي كانت هي

الداء ..

العجوز (٣) : أو كما قال أبو نواس في عصر النهضة
والمجد ، أيام المفكر الداهية والحاكم
العادل ، والمفرش العظيم سيدنا هارون
الرشيد أعطني ..

الجرسون : فهمنا ..

(يفتح غطاء النعش ويطل منه رأس
الميت ويلتفت إلى الجرسون)

الميت : بالصودا من فضلك !!

(ويعود الميت ويغلق على نفسه النعش ..
ميمي لا تزال ترقص رقصة شرقية ..
كلمات الإعجاب والتهليل من كل
فاحية)

العجوز (١) : يا وعدى .. ولا زبيدة راقصة الخليفة
المأمون ..

(الميت يفتح غطاء النعش وينظر إلى
ميمي)

الميت : (مبهورا) أموت تانى ..

(فؤاد الطبال يقترب من ميمى وهو
ينقر على طباته ويهمس فى أذنها)

فؤاد الطبال : (هامسا) خلصى الرقصة وروحي اعدى
مع الجماعة ..

ميمى : أنهى جماعة ؟

فؤاد : الجماعة المدهيين .. هو فى غيرهم ..

ذهب .. ذهب .. مال سايل .. (يقترب

منها هامسا) أنا اتفقت معاهم على ميت
جنيه ..

ميمى : امبارح كانوا ميتين ..

فؤاد : امبارح راح ..

ميمى : وبكره حايقوا خمسين ..

فؤاد : بكرة لسه ما جاش ..

ميمى : (ملتاعة وهى تزفر أنفاسها) أنا

خلاص .. زهقت ... تعبت ..

فؤاد : حد يزهق من الذهب .. حد يتعب من

الفلوس ..

ميمى : (في مرارة) الذهب مش ممكن يعمل
منى إنسانة .. الفلوس يدوبك تعمل منى
حيوان .. أشتري بيها عيش زى ما بشتري
بيها برسيم للجاموسة .. واشتري بيها
عقد .. ممكن أعلقه فى رقبتى ، وممكن
أعمل منه طوق للكلب .. واشتري بيها
طوب أعمل منه بيت .. بيت فاضى ..
بارد .. زى التريبة .. بيت ما فيهش عقل ،
يفكر ... ما فيهش قلب بيعحب ..

فؤاد : (مقاطعا فى حدة) انتى عايزه إيه يا ست
انتى ..

ميمى : عايزه عقل .. عايزه قلب .. تعرف يا فؤاد
لو كان عندى عقل وقلب .. كنت انا اللي
جبت الفلوس .. ما كنتش احتجت لحد
تانى .. هم اللي فى أفريقيا مش عندهم
مناجم ذهب ، إنما ما عندهم عقل .. جه
اللى عنده عقل وهو اللي أخذ الذهب ..
وبقوا بتسوع أفريقيا يجسروا وراه ،

واستعملوا منه النذل والكرباج علشان
يديهم شوية ذهب من بتاعهم .. زى ..
زى تمام ... زى ما بتعمل فى .. تاخذنى
تبعنى للناس علشان أجيب لك ذهب .. لو
كان عندى عقل كنت جبت لك الذهب من
غير ما تبعنى .

قواد : (وهو ينظر إليها فى قسوة) أنا عارف مين
اللى حط فى راسك الكلام ده ؟. إنما لازم
تعرفى ان الدنيا كلها بيع وشرا ..

ميمى : وانا بابيع إيه .. بابيع حاجات ما تتبعش ..
حاجات بتاعتى أنا لوحدى .. حاجات ما
يبعهاش الإنسان .. الإنسان يبيع أفكاره ..
بيبيع شغله .. وانا ما عنديش أفكار ابيعها ..
وما عنديش شغل .. لا .. عندى شغل ..
فنانة .. بارقص وباغنى .. إنما ما حدش
بيشترى الرقص والغنى منى .. واللى
بيشتره ما بيدفعش كفاية .. يدوبك
زى العجاموسة .. يشتروا لبنها
(لا أستطيع ..)

بتمن أكلها .. (تنظر إليه في توصل) ..
فؤاد .. علمني ازاي أفكر .. كلم عقلي ..
مش لاقيه حد بيكلم عقلي .. كلكم بتكلموا
جسمي .. واحد بيكلم خدودي .. والثاني
بيكلم صدري .. والثالث بيكلم رجلي ..
ما حدش بيكلم عقلي .. ما حدش محتاج
لعقلي ..

فؤاد : (في سخط) هو انتي كل ليلة تطلعي ديني
بالهلوسة دي ؟ تفكري في إيه يا ست ؟
ما الشغل قدامك أهو .. وتفكري ليه ؟ ما
انا بافكر لك أهو ..

ميمي : (بلا غضب) انت ما بتفكرش .. انت
بتبيع .. كل حاجة قدامك بتبيعهها .. كل
حاجة ربنا ادهالك بعتهها .. بعتهني .. وبعته
نفسك .. وبعته اللي فات .. وبتبيع اللي
جاي .. بتبيع من غير تفكير .. إنما أنا عايزه

افكر .. ويوم ما ابيع ما ابعش نفسى .. ابيع
اللى يطلع منى .. أفكارى .. شغلى ..

: أمال انتى بتببعى إيه دلوقتى .. ما هى
أفكارك وشغلك ..

فؤاد

: لا .. بابيع راسمالي .. زى الفلاح ما بيع

ميمى

أرضه .. زى العامل ما بيع العدة اللى

بيشتغل بيها .. وانا راسمالي كبير .. أنا

عارفه .. أنا جميلة .. جميلة قوى .. أجمل

واحدة فى الدنيا .. وبابيع جمالى .. بابيعه

للناس .. بدل ما افكر واشتغل .. ياخذ كل

اللى حيلتى واحطه فى سرير راجل ..

يمصنى .. ويدلنى . ويعذبنى .. ويصبح

الصبح يرمى التمن .. وبكرة مش حايقى

عندى حاجة .. حانخلص .. جسمى

حاينخلص .. جمالى حاينخلص حايجعلونى

زى عود القصب .. وابقى ثقل .. مش

حالا في حاجة ابيعها ..

فؤاد : (يخبط على طبلته خبطتين بعنف ،

ويصيح في لهجة قاسية) ميمى ..

قدامى ..

ميمى تتراجع إلى الوراء في خوف .

ميمى : (خائفة تحدث نفسها) أنا خايفة .. مش

لازم اخاف .. اللي بيخاف مش ممكن

يفكر .. الخوف سجن .. لازم اهرب من

السجن علشان اعرف افكر .

(فؤاد يمد يده ويقبض على معصم

ميمى في قسوة ويشدها وراءه متجها إلى

مائدة العربان المذهبين .

يقف العربان استعدادا لاستقبال

ميمى ..

فجأة يهب العملاقان (كل منهما بلا

رأس) ويتقدمان نحو ميمى وفؤاد)

العملاقان : (فى لهجة أمرة) عندك .. ميمى تيجى
تقعد معنا .. دى بتاعتنا .

قراد : (فى لهجة وخوف) بس البهوات
طلبوها الليلة ..

العملاق (١) : ما يهمش .. احنا الأقوى ..

العملاق (٢) : احنا الرصاص ..

العملاق (١) : احنا السكاكين ..

العملاق (٢) : احنا الضرب ..

العملاق (١) : والقنبلة الذرية إذا لزم الأمر ..

العملاقان : (فى صوت واحد) احنا الحماية .

ميمى : (ساهمة) نفسى أحمى نفسى بنفسى ..

اللى الاقوى منى سيدى .. نفسى أعيش من

غير سيد ..

(يتقدم العريان المذهبان والجنيهات

الذهبية المعلقة فى ثيابهما تشخل) .

العريان : (فى صوت واحد) احنا الفلوس ..

ميمى : (ساهمة) الفلوس دم وعرق .. كل جنيه مدفون فيه بنى آدم ..

(يتقدم العواجيز الثلاثة ، ويفتح الميت غطاء العرش ، ويقوم من نعشه ويلحق بهم) ..

العواجيز : (مع الميت فى صوت واحد) احنا

المجدد الخالد .. احنا اللي كنا فى سقط اللوا بين الدخول فحومل .. احنا معاوية ، وهارون الرشيد والسلطان قلاوون ، وكافور الإخشيدى ، احنا الإمبراطورية .. احنا الشعر الموزون المقفى .. احنا التواشيح الحلوة .. احنا العصر الذهبى .. احنا اللي فاضلين ..

ميمى : (ساهمة) اللي يمشى .. لازم يمشى

لقدام .. مش ممكن يمشى لورا ..

الثلاثة الملونون : (أبيض وأسود يتقدمون) احنا اللي فى

كل حنة تلاقينا .. احنا اللي كل فرصة ما
نفوتش من تحتينا .. احنا اللي مع
الجايين .. احنا اللي أكلنا عقل الجميع ..
: (ساهمة وساخرة) وشين اليومين دول
مش كفاية .. لازم اربع وشوش ..
خمسة .. وانا ما ليش إلا وش واحد ..
(تقوم خناقة بين الجميع .. وترتفع
الأصوات .. وهـرج صاحب ..
الموسيقى تعزف ألحانا مختلطة .. وترتفع
أصوات)

ميمى

العملاقان : احنا القوة ..

العربان : احنا الفلوس ..

الشيوخ : احنا المجد ..

الملونون : احنا الكسبانين ..

(تختفى ميمى وسط المعركة) .

(الجرسون يدخل مهرولا) .

الجرسون : (صائحا) ميمى هربت ..
(تسكت الأصوات مرة واحدة) .
(وتردد أصوات خافتة بين
الجميع) .

ميمى هربت .

هربت ..

هربت ..

(فؤاد يتقدم إلى مقدمة المسرح) .

فؤاد : (فى غيظ) أنا عارف هى راحت فىن ..
راحت عند الأستاذ .. (ثم بصوت عال
ساخط) والله لخرى بيت الأستاذ ..

(ستار)

المشهد الثانى

(صحراء قاحلة .. فى طرفها شجرة تين
شوكى وفى وسط الصحراء (وسط المسرح)
مكتبة كبيرة مملوءة بالكتب الضخمة ..
وأمامها مكتب عليه جرافافون من الطراز
القديم صغير) .

(سلم خشبى صغير مسند إلى المكتبة يقف
عليه الأستاذ مجاهد .. رجل فى الخامسة
والثلاثين .. نحيف جدا .. وقصير ..
ممصوص الوجه .. يضع على عينيه نظارات
سميكة .. الأستاذ مجاهد يحاول أن يشد من
بين كتب المكتبة ، كتابا ثقيلًا كبير الحجم
جدا .. ويترنح تحت ثقله ، ويكاد يقع من فوق

السلم .. ثم ينجح في حمل الكتاب
والنزول به من على السلم .. ولكنه ينوء
تحت ثقل الكتاب .. ويعود يترنح به ..
ويطوف بالمسرح وهو يترنح تحت ثقل
الكتاب ويكاد يقع في كل خطوة .. إلى
أن ينجح أخيرا في أن يضع الكتاب فوق
المكتب .. ويتهد في راحة .. ويربت
على الكتاب بيده) .

مجاهد

(مخاطبا الكتاب) يا أستاذي العظيم
كاركوس .. لا تستهن بتلميذك مجاهد ..
إنه يستطيع دائما أن يحملك .. أحملك في
رأسي .. وأحملك على كتفي ..
(يجلس إلى المكتب ..
يفتح الكتاب ..

ثم يفتح درجا من أدراج المكتب ..
ويخرج منه ساندويتش فول .. ويأخذ في
قراءة الكتاب وهو يأكل الساندويتش) .

(تدخل ميمى مهرولة وهى تتلقت
حولها ولا تزال ترتدى الحبرة والبرقع
الأبيض ..)

(الأستاذ مجاهد لا ينتبه لها ، مستمرا
فى القراءة ومضغ ساندويتش الفول ..)
(تقف ميمى ملتصقة بالمكتب
محدقة فيه ..)

: أستاذ .. أستاذ مجاهد ..

ميمى

(يفاجأ الأستاذ بصوتها ، ويقف
مذعورا .. ويتفتف فى صدره ليذهب عن
نفسه الخوف الذى سببه له المفاجأة)
(يمد الأستاذ يده ويخطف
ساندويتش الفول من على المكتب ويخفيه
وراء ظهره)

: (وهو يخرج من وراء المكتب) ماذا أتى

مجاهد

بك ..

: هربت .

ميمى

- مجاهد : (فى استكار) إيه ؟ .
- ميمى : هربت .. جيت لك .. جيت علشان تكلم
عقلى .. انت الوحيد اللى بتكلم عقلى ..
كلهم بيكلموا جسمى ..
- مجاهد : دقيقة واحدة .
- (ينحنى على الكتاب ، ويقلب
صفحاته ثم يتمتم وهو يقرأ بعض
السطور ، ثم يرفع رأسه ، ويصيح)
- مجاهد : (صائحا) خطأ .. الهرب فى مثل هذه
الحالة .. انحراف .. سلبية ..
- (ويخفى ساندويتش الفول فى درج
المكتب) ..
- ميمى : أنا ما هربتش .. الهرب إن الواحد يهرب من
نفسه .. وأنا ما هربتش من نفسى ..
بالعكس .. أنا جيت ادور على نفسى .
- مجاهد : نفسك ما تلقىهاش إلا فى المجتمع اللى انتى

عائشه فيه .. الناس هي حصيلة المجتمع ..

ميمي : المجتمع اللي انا عائشه فيه مش لاقيه فيه

نفسى .. كل اللي فيه جايسن من بره

وعائشين بره .. ما فيهمش حد حاسس

ياحسامى .. ولا حد نفسه فى اللي انا نفسى

فيه ولا حد بيدبنى اللي انا عايزه آخذه ، ولا

بياخذ اللي انا عايزه اديه ..

مجاهد : هذه هي الآنية الاستعلائية .

ميمي : ما عرفش تبقى إيه .. اللي انا عايزاه انى ابقى

حره .. ملك نفسى .

مجاهد : الحرية الفردية هي خيانة أوتقراطية

ميكافيلية رأسمالية ساديزمية ..

ميمي : الحرية ان يبقى لى سرير لوحدى ..

لوحدى .. زمان كنت باسمع شاعر الريابة

يقول ان هارون الرشيد اعتلى سرير

الملك .. أهو انا عايزه سرير الملك .. كل

واحد فى الدنيا لازم يبقى عنده سرير
الملك .. مش سرير ذهب ولا سرير
حديد ، ولا خشب ولا جريد .. المهم انه
يبقى سيره .. بتاعه .. ما حدش يهوب
جنبه الا بأمره .. نفسى .. نفسى يبقى لى
سرير انام فيه لوحدى .. وأوده .. أوده
صغيرة محندقه .. أكنسها . وامسحها ..
وازوقها .. وابص من شياكها على الناس ..
كلهم .. واحبهم .. واضحك لهم ..
واغنى معاهم .. أنا عمري ما كان لى سرير
لوحدى .. كان دايم فى سريرى حد
غريب .. تركى ، ولا انجليزى ولا
فرنساوى ، ولا أمريكانى ولا هكسوسى ..
نفسى انام فى سريرى مرتاحه .. لوحدى ..
تعرف أنا متها لى ان الحرية معناها
الوحده .. يوم ما ابقى لوحدى أبقى

حره ..

الأستاذ : انتى جاهله .. إن باطنك مستغلق على بذور
رجعية محتقنة باسم الآنية الاستعلائية .. إن
الالتحام الجماهيرى يولد الطاقة الديناميكية
اللازمة للاتعاش التكنيكي فى زوايا
المخطط المستلهم من مقتضيات التقدم
الطبقي داخل مسيرة التاريخ ..

: مش فاهمه .. بتقول إيه ؟

ميمى : عمرك ما حاتفهمى .. مش مفروض انك
الأستاذ تفهمى .. الكادر بس هو اللى يفهم ..

ميمى : الكادر .. وانا .. أنا عايزه افهم ..

الأستاذ مجاهد : علشان تفهمى لازم اكلمك بلغة غير
علمية .. وانا ما اقدرش اتكلم إلا بالعلم ..

ميمى : علشان خاطرى .. كلمنى على أدى ..

الأستاذ : (فى تردد) ببساطة .. الحرية مش هى
الوحدة زى ما انتى فاهمة .. الحرية هى

حرية المجموع . حرية الناس كلهم ..
الوحده مش ممكن تكون حرية .. لأن
الوحدة فردية .. وانا فاهم انتى عايزه تقولى
إيه .. الوحده اللى انتى بتكلمى عليها
بسموها فى العلم السياسى ..
الاستقلال .. فيه عقول قديمه متجمده
متأخره لسه فاكروه ان الاستقلال هو
الوحده . هو الاكتفاء الذاتى .. كله ده
خلاص .. مبقاش فيه حاجه اسمها وحدة
الطبقه فى العالم كله .. كل الناس وحده
واحد ..

: الناس .. المجموع .. أنا باحب الناس
كلهم .. باحب المجموع .. أحب اشتغل
معاهم .. وارقص لهم .. واغنى . أحب
الناس .. الناس كلهم فى قلبى .. فى
دنىتى .. بس مش فى سريرى .. عايزه

ميمى

سرير لوحدى .. كل واحد من الناس دول
لازم يبقى له سريره .. وأودته .. يقوم من
سريره ويخرج من أودته ويتلموا على بعض
فى مصنع .. فى وزاره .. فى جامعه .
ويشتغلوا .. كل واحد حاسس بنفسه ..
كل واحد عنده وحدته .. وحاسس بوحدة
غيره .. الوحدة حلوه .. الوحدة قوه ..
طول ما انا لوحدى حاسه انى قويه ..
أتحكم فى نفسى .. أتقلب على الجنب ده
والجنب ده زى ما انا عايزه .. الوحدة
كرامه .. ما حدش يقدر يهيننى وانا فى
وحدتى . بتقول الوحدة فرديه .. أبدا
الفرديه هى اللى يفكر فى نفسه بس ..
واللى يفكر فى نفسه ما يقدرش يتمتع
بوحده .. اللى يفكر فى نفسه يبقى طماع
جشع مؤذى ويخرج على الناس عشان
(لا أستطيع ..)

يستولى عليهم ويرضى فرديته .. إنما اللى
بيتمتع بوحدته هو اللى قلبه يساع الناس
كلهم .. هو اللى حاسس بالمجموع كله
داخل نفسه .. يقدر يبقى وحيد ، وهو آمن
على وحدته .. سعيد .. مرتاح .. آمن ..
ما حدش حايطالبه بحاجه .. ما حدش
حايعتدى عليه .. ما فيش محضر حايفخس
يحجز عليه .. تعرف أنا ..

الأستاذ

: (مقاطعا) أيتها الجاهلة .. إن ..

ميمي

: أرجوك .. سببني أحلم . أنا نفسي بعد ما
يقالى سرير لوحدي ، وأوده لوحدي ،
أخرج اروح مصنع ، واقعد قدام ماكنة
كبيرة .. كبيرة قوى .. أكلمها
وتكلمنى .. وتاخذ منى وتدينى .. تعرف
أنا نوبة رحى مصنع نسيج كبير قوى ..
وشفت ناس كثير .. كل واحد واقف قدام

ماكنة . ما كانش حد بيكلم التانى ، كل واحد كان بيكلم الماكنة اللي قدامه ..
يبص لها .. وبتبص له .. بيضحك لها
وبتضحك له .. ويديها وتديله .
حسدتهم .. ومن يومها وانا باتمنى انى أقف
قدام ماكنه أنا كمان ، واكلمها .. الكلام
مع الماكينات كلام مفيد .. كلام منتج ..
طول ما الماكنة شغاله فيه حاجة بتحصل ..
إنما الناس .. الناس بتكلم كثير وما فيش
حاجة بتحصل ..

: (بامتعاض) أنت تناقضين نفسك .. إنك

الأستاذ

تقولين إن الحرية هي الوحدة ، ثم تطالبين
بالاتحاد الجماهيرى .. كيف تكون

وحدة ، والاتحاد .. ها .. ها ..

: لا .. مافيش تناقض .. الوحدة هي إنى

ميمى

أستغنى . قوة الوحدة هي قوة الاستغناء ..

ومش ممكن استغنى إلا إذا اشتغلت ..
ومش ممكن اشتغل إلا إذا كان فيه
ماكينات .. ماكينات للناس كلهم علشان
يشتغلوا ..

: (ساخرا) والممكن ده يبقى بتاع مين
بقى .. (فى لهجة خطاوية) من يملك
الآلة .

الأستاذ

: ولا حد .. مافيش حد بيملك العمال ،
كمان مافيش حد يملك المكنات ..
المكنات زى الناس .. فى حد يقدر يقول انا
باملك الناس .. كمان مافيش حد يقدر
يقول أنا باملك المكنة .. مستعجب ليه ..
أيوه .. الناس زى الآلة .. الناس بتاكل عيش
ولحمة ، والماينة بتاكل زيت وكهربا ..
الناس بتشتغل سبع ساعات فى الوردية ..
والماينة بتشتغل سبع ساعات فى

ميمى

الوردية .. الناس بتروح تنام فى بيوتها .
والممكن بينام فى المصنع .. الناس
بتتخصص .. تجيب واحد وتركبه تركيبة
مهندس يطلع مهندس ، وتجيب حديد
تركبه تركيب موتور يطلع موتور .. اللي
يملك الناس هو القانون ، واللى يملك الآلة
هو القانون برضه .

: الممكن لا عقل له ..

الأستاذ

: ربنا حط العقل فى الإنسان .. والإنسان حط
عقله فى الماكينات .. يبقى الممكن له عقل ..
وفيه مكنة ذكية بتشتغل زى اللهلوبة ، ومكنة
غبية كل ساعة تقف .. فيه إنسان بيشيخ
ويبقى رجعى فى تصرفاته ، كمان فيه
مكينات بتشيخ وتبقى رجعية فى شغلها ،
وتتركن وتموت ، وتيجى مكنة من الجيل
الجديد .. تمام زى البنى آدم ..

: الممكن ليس له إرادة .

الأستاذ

: ولا الإنسان له إرادة .. الإرادة هى مجموعة

ميمى

الظروف الخارجية اللي بتفرض على
الإنسان تصرفاته .. كل ما هناك إن فيه إنسان
يبقى أضعف من الظروف اللي حواليه ، تقوم
نقول عليه ما عندوش إرادة .. كمان الممكنة
إرادتها في الظروف المحيطة بيها ..

الأستاذ مجاهد : الممكن مالوش عاطفة ..

ميمى : (في حيرة) عاطفة! انت بتتكلم عن

العاطفة .. انت فهمتني إن مافيش عاطفة ..
مافيش روحانيات .. قلتلي إن كل ده أفيون
الإنسان بيخدر بيه نفسه عاشان يخبي
احتياجاته الجنسية .. لكن صحيح ..
الماكينات ماتقدرش تحب .. ماتقدرش
ترحم .. ماتقدرش تثور .. ماتقدرش تحس
بالشوق .. بالحنين .. إنما المكينات كمان
ماتقدرش تظلم .. ماتقدرش تخون ..
مافيش ما كينة بتيجي في سريري وتكتم علي
أنفاسي .. يا ريتنا كنا مكينات ..

الأستاذ مجاهد : أنت ما كينة .. أنت آله .. ماذا تنتج هذه

الآلة .. إنها ترقص .. ارقصى .. ارقصى أيتها
الآلة ..

- ميمى : مش عايزة ارقص ..
مجاهد : ليس من حق الآلة أن ترفض ..
ميمى : (فى أسى) حتى انت .. كنت فاكرة انك
حاتكلم عقلى، لقيتك بتكلم نفسك ..
وبتطلب اللي انت عايزه، مش اللي احنا
الانين عايزينه .. إيه الفرق بينك وبين بقية
الزباين .. زباين الكباريه الأخضر ..
مجاهد : الفرق فى المبادئ .. فى الأهداف .. أنا
بافهم رقصك غير ما الزباين بتفهمه ..
ميمى : مش كفاية انك تفهم .. لازم أنا كمان
افهم .. إنما الآلة ما حدش عايزها تفهم،
عايزينها تشتغل وبس اصحابها هم اللي
يفهموا .. العالم كله ماكينات يتحكم فيها
أصحاب الماكينات .. ما فيش بلد كل اللي
فيه ماكينات ولا بلد كل اللي فيه أصحاب
ماكينات ..
مجاهد : هذه شورانية رجعية تدل على تفكير

- أركينياكى ..
- ميمى : أهوانت كده .. ما تردش على إلا بكلام ما
افهموش ..
- مجاهد : (فى تودد) ارقصى .. الرقص تستكملين
به شخصيتك ويقودنا إلى الفهم
الأيدلوجى ..
- (ميمى تقوم واقفة لتستعد للرقص)
- مجاهد : اخلعى الأول البرقع اللى مغطى وشك ..
هذا البرقع بيدل على أنك تعيشين فى القرن
السابع عشر .. تحررى .. عيشى مع العالم
التقدمى .
- (يمد مجاهد يده وينزع البرقع من
فوق وجه ميمى ، فيبدو من تحته برقع آخر
لونه أحمر يغطى وجه ميمى) .
- مجاهد : أهو كده .. دلوقتى بان جمالك ..
ودلوقتى تشوفى أحسن ، وتفكرى

أحسن .. دلوقتي بقيتي عايشه فى العالم
كله ..

(يتجه مجاهد إلى الجرامفون ويدير
فوقه أسطوانة لموسيقى أجنبية) .

مجاهد : ارقصى يا ميمى ..

(ميمى تهتز راقصة بعض هزات ثم
تتوقف عن الرقص) .

ميمى : مش قادره .. مش قادره أرقص على
المزيكة دى .. مش حاسة بيها ..

مجاهد : يا غبية .. يا عبيطة .. يا رجعية .. دى
موسيقى كورساكوف ..

ميمى : ولو .. دى موسيقى أسمعها ولكن ما
تهزنيش .. كأنها كتاب بلغة لا أفهمها ..

مجاهد : الموسيقى لغة عالمية ..

ميمى : حتى الموسيقى محتاجة لترجمة .. لازم
ترجمها لى .. وبعد ما ترجمها لازم أحسن

بيها ، وانفعل بيها .. وبعدين أطلع منها
حاجه بتاعتى أنا .. حاجه طالعه منى ،
وبتعبير عنى أقوم اقدر ارقص عليها .. زى لو
قلت لى ارقصى باليه .. ما ارقصش .. الباليه
حلو بس مش بتاعى .. مش لغتى .. الرقص
البلدى لغتى ، زى الباليه لغة ناس تانية ..
وكممان المزىكة .. مزىكة سيد درويش
مزىكتى .. طالعة منى .. بتاعتى .. ومزىكة
اللى بتقول عليه ده تبقى مزىكته ومزىكة
أهله ..

مجاهد : كل إنسان حيث يضع نفسه .. إذا وضعت
نفسك فى كورساكوف حاتبقى
كورساكوف .. وإذا وضعت نفسك فى
سيد درويش حاتبقى سيد درويش .. ضعى
نفسك فى كورساكوف وارقصى ..

ميمى : حارقص زى ما اكون باتعلم لغة جديدة ..

(تبدأ ميمى فى الرقص)

* * *

(يدخل فؤاد الطيال يحمل طبلته ، بينما

ميمى لا تزال ترقص) .

فؤاد : لقيتك .. لو رحى الدنيا حالفاكى ..

وتروحي منى فىن ده بعدك ..

(يبدأ فؤاد فى النقر على الطبله نقرات

راقصة ، بينما أسطوانة الموسيقى الأجنبية لا

تزال دائرة ومجاهد واقف بجانبها يدير جهاز

الجرامفون الذى يملأ به الزمير كأنه يريد أن

يعطى الجرامفون قوة أكبر .. وميمى حائرة

تهتز بعض هزات على الموسيقى الأجنبية ، ثم

تهتز بعض هزات على نقرات طبله فؤاد .. ثم

توقف مرة واحدة وتسقط جالسة على

الأرض) ..

ميمى : (صارخة) مش قادره .. مش قادره .. واحد

فيكم بيرقص جسمي ، والتاني بيرقص
عقلي .. مش ممكن اعيش وجسمي في
حتة ، وعقلي في حتة تانيه .. مش
ممكن ..

مجاهد : العقل هو اللي يسيطر على الجسم ..
فؤاد : الجسم هو اللي يفرض على العقل اللي هو
عايزه ..

ميمي : لا العقل بقى عقلي ، ولا الجسم بقى
جسمي .. أنا غلبانه .. حيرانه ..
تعبانه ..

(فؤاد يقترب من مجاهد بعيدا عن

ميمي)

فؤاد : نتفق احسن ..
مجاهد : ما عنديش مانع .. بس مش على حساب
الأيدلوجية ..

فؤاد : اطمئن .. أنا اقدر انقر على طبلتي أي

أيدلوجية ..

(يرفع مجاهد إبرة الجراففون ،
وتسكت الموسيقى الأجنبية ، ثم يميل
على فؤاد ويتها مسان همسا طويلا ،
تخلله إشارات بأيديهما ، ثم يتصافحان
كأنهما اتفقا .. ويتجه مجاهد نحو ميمي
التي لا تزال جالسة على الأرض ، ويمد
يده ويشدها من ذراعها لتقوم واقفة)

مجاهد : تعالي يا ميمي ..

ميمي : على فين ..

مجاهد : تعالي بس .. ده انا حا علمك كل اللي انتي

عايزاه .. وحاحط عقلك في جسمك ..

وجسمك في عقلك ..

ميمي : انت بتكلم زي ما تكون زبون ..

مجاهد : أنا مش زبون يا ميمي .. أنا صديق ..

خدي ..

(يخرج مجاهد من درج المكتب
ساندوتش الفول ويقطع منه قطعة يعطيها
لميمى ، ويبدأ هو فى أكل القطعة
الأخرى) .

مجاهد : با اقولك حاشبعك .

(ويشدها معه ويسيران معا وهما
ياكلان الساندوتش إلى أن يختفيا خلف
المكتبة الكبيرة المقامة فى الصحراء) .
(فؤاد جالسا وحيدا أمام الجمهور
وينقر على طبلته نقرات قريبة من نغمات
لحن زفة العروسة .. ويستمر ينقر وهو
وحيد على المسرح مدة طويلة ..
وفجأة ..)

(يخرج مجاهد وهو مرتد جاكيت
مذهبة بخيوط ذهبية كثيرة كجاكت الحلة
الرسمية التى كان يرتديها الوزراء فى

العهود السابقة ، ويلاحظ أنه يرتدى هذه
الجاكت على البنطلون القديم المهلhel
الذى كان يرتديه .. وهو يسير فى عظمة
وفخامة كأنه أصبح رجلا مهما .

(فؤاد يخطب على الطلبة بخطبات تحية
ويطلق من فمه لغمات السلام الملكى
القديم ثم يضحك) .

مجاهد : (فى عظمة) بتضحك على إيه ؟ ..

فؤاد : فرحان بيك .. ما حدش وصل سرير ميمى

إلا وقام لابس جاكتة مذهبة ..

مجاهد : قصدك إيه ؟

فؤاد : ما ليش قصد .. عمرى ما كان لى قصد ..

أنا طبال وبس .. لو كان لى قصد ما كنتش

خليت حد يقرب لميمى ، ولا حد لابس

جاكتة مذهبة غيرى ..

(مجاهد يجلس على المكتب ويبدأ

فى تقليب بعض الأوراق ، ويقترب منه
فؤاد يحاول أن ينظر فى الأوراق)

مجاهد : من فضلك .. احنا ما اتفقناش على كده ..
مش من حقت تبص فى أوراقى .. كل
حقت انك ترقص ميمى لما اقول لك
رقصها ..

فؤاد : بس لازم اعرف بارقصها ليه وما ارقصهاش
ليه ..

مجاهد : حابقى اقول لك .. علشان تفهم اللي عاوز
تفهمه لازم تبقى فى الكادر وانت مش فى
الكادر ..

(يهز فؤاد كتفيه ويتعد)

مجاهد : دى مسئوليات .. مسئوليات كبيرة ..
لازم نبتدى نبني من جديد .. نبني الناس ..
نخلقهم .

فؤاد : دى شغلة ربنا ..

مجاهد : أمال انا شغلتي إيه .. ما كان بلاش تتعبوا
نفسكم وتيجوا لغاية عندي ما دام عندكم
ربنا ..

(يسكت فؤاد وهو يهز كتفيه في لا
مبالاة، وينهمك مجاهد في قراءة الأوراق
أمامه)

(يدخل إلى المسرح جمل يسير
على عجالات ويقوده رجل في زى أوروبى
قديم ، والجمل محمل بمجموعة ضخمة
من الكتب وهى فى مجلدات حديثة
أنيقة) .

مجاهد : (فرحا) جئتم فى وقتكم .. أنا كنت لسه
حابت لكم ..

قائد الجمل : سمعنا بالخبر السعيد وجئنا لك بكل
النظريات والتقارير وأسرار العالم الجديد ..

مجاهد : الحقونى ..

(لا أستطيع ..)

(يشترك الجميع في إنزال الكتب
والمجلدات .. وفؤاد يصبق على الأرض
في قرف ويخبط خبطات احتجاج على
الطبله ، وتخرج ميمى من خلف المكتبة
الكبيرة كأنها استجابت لصوت الطبله) .

- ميمى : إليه ده ..
مجاهد : دى الأيدلوجية .. النظرية .. العلم ..
ميمى : دى كتب .. ده كلام .. وانا شعبانه
كلام .. كل الكلام اللي انكتب واللى لسه
حايينكتب سمعته .. وحفظته .. احنا فى
صحراء يا مجاهد .. وماقدرش اقعده معاك فى
صحرا ونقرا كتب ..
مجاهد : الصحراء فى عقلك .. علشان تبنى
الصحراء وتزرعيها يبقى لازم تبنى عقلك
وتزرعيه بالأيدلوجية .
ميمى : الأيدلوجية ماتسترنيش .. اللي يسترنى ابنى

ما احتاجش لحد .

(يدخل إلى المسرح جمل آخر لا يسير على عجالات ويقوده رجل فى زى عربى قديم ، وهو جمل محمل بمجموعة من الكتب يبدو أنها كتب قديمة) .

مجاهد : إيه اللي جابكم .. ما حدش عايزكم ..
خلاص كفرنا بيكم ..

الأعرابي : جاينن تنقذ ميمى من اللي دخلوا عليها ..
ميمى : تنقذونى بإيه .. بكتب .. أنا شعبانة

كتب .. أنا عايزة ابنى .. عايزه بيت ..

الجمال الأوربى : احنا التقدم .. احنا المستقبل ..

الجمال العربى : احنا الأصل .. احنا الطبيعة .. احنا التاريخ

احنا أصحاب الأرض .. وأصحاب

البيت .. احنا أهل اليمين ..

الجمال الأوربى : اليمين راحت عليه مع الزمن .. احنا اليسار ..

من اليسر .. يعنى التقدم .. يعنى البناء ..

الجمال العربي : اليمين .. الجنة .. واليسار .. جهنم ..
ميمى : أنا لا فى جنه ولا فى نار .. ولا عارفه يمين
من يسار .. أنا عايزه اعيش .. عايزه يبقى
لى بيت ..

فؤاد : اليسار مخالفة مرور .. واليمين زحمة ..
ميمى : ابعدوا عنى .. أنا حاسه انى رجعت
الكباريه الأخضر تانى .. مجاهد ابعدهم
عنى ..

الجمال الأوروبى : (للعربى) اتم جنيتم على ميمى ..
الجمال العربى : واتم عايزين تاكلوا ميمى ..
(تقوم معركة بين قادة الجمال
الأوروبيين والعرب)

مجاهد : فؤاد رقص ميمى ..
(فؤاد ينقر على الطبلقة نقرات
راقصة ، وترقص ميمى فى تردد ، ولا
تكاد تبدأ فى الرقص حتى تسكت

المعركة ، ويقف الجميع ينظرون إلى
الرقص) .

(ميمى تتوقف عن الرقص فى هدوء)

ميمى : ما فيش فايدة حافظل طول عمري
رقاصه .. وحافظل العالم كله زباين لازم
ارقص لهم .. ما فيش فايدة ..

(تسير ميمى وتختفى خلف المكتبة

الكبيرة ، ويبدأ الواقفون على المسرح فى
نقاش حاد)

مجاهد : أنا اللي اختار الأيدلوجية .

العربي : انت واحد .. اللي يختارهم الناس .. من
حقنا نكلم الناس ..

الأوربي : الواحد هو الكادر .. والكادر هو الناس ..
احنا بس اللي نتكلم ..

فؤاد : (ينقر على الطبله) الطبله هي اللي
بتتكلم .. طول عمرنا هنا بنطبل ..

(فجأة ينطلق صوت رصاص عيف من
خلف المكتبة ، وصوت أزيز طائرات ،
وصوت دبابات وقنابل)

الأوربي : دي حرب .. (يجر جملة ويخرج
مهرولاً) .

العربي : دي زي ما تكون الدنيا قامت .. (يجر
جملة ويخرج هارياً) .

مجاهد : يا خير اسود ومهيب .. ده رصاص .. زي
ما تكون حرب .. ربنا يستر (يخرج
ويختبئ تحت المكتب) .

فؤاد : دلوقتي بتقول ربنا يستر .. اشمعني الأول
ما كنتش بتقول ربنا .. وانا اروح فين ..
ميمي .. ميمي .. (ينقر فؤاد على الطبله
نقرات عصبية متلاحقة) يا ترى ممكن
صوت الطبله ينسيها صوت الرصاص . يا
ترى ممكن الطبله تنسيها الحرب .. يا ترى

حالتك إيه يا ميمى .. وحاشتغل معاكى بعد
كده وازاى يا ميمى ..

(تدخل ميمى وهى تتعثر فى مشيتها ..
جريحة .. والدماء تنزف منها .. وقد لزعت
البرقع عن وجهها وظهر وجهها الأسمر
مغطى بالدماء .. قد اختفت ذراع من
ذراعيها كأنها قطعت) .

: ضربونى .. الرصاص فى كل جسمى ..
ونخدوا حتة منى ..

ميمى

(فؤاد يتراجع وهو يكاد يركى ..
ويخرج مجاهد من تحت المكتب ،
ويتقدم إلى ميمى فى ارتباك) .

: سنجد الحل .. كل شىء سيعود إلينا .. إن
كتاب الأسرار الكونية فى المنظمة الدولية
يقول فى النص التاسع والخمسين من البند
ألف ومائتين . إن الحل فى يد القوى

مجاهد

الجماعية التي يشكلها المجتمع العالمي
المستنير بالاستعلامية الشتوبرانية .

(يذهب إلى المكتب ويعود حاملا كتابا)

: حتى شوفى .. اقرى بنفسك ..

مجاهد

(ميمى تمسك بالكتاب بيدها السليمة

وتنهال به فوق رأس مجاهد فيقع على

الأرض كأنه مات)

: أنا مش عايزه كتاب .. مش عايزه كلام ..

ميمى

عايزه دراعى اللي راح .. عايزه ارجع دمي

اللي نزفوه .. عايزه اعيش .. أنا باموت ..

(يقترب منها فؤاد وينقر على الطلبة)

: ارقصى يا ميمى .. طول عمر الرقص

فؤاد

بيداوى جروحك .. تعرفى هم ضربوكى

ليه ؟ علشان ما رقصتيش لهم .. لو كنت

رقصتى ما كانوا قربوا منك .. الرقص

يعنى أكل المخ ، وانتى ما أكلتيش مخهم ،

فأكلوكى ..

(ميمى تمد يدها وتخطف الطبله
وتقذف بها على الأرض فتحطم كلها ..
ويقع فؤاد بجانب طبلته) .

ميمى : الطبله هى اللى ضيعتنى .. الرقص هو اللى
شغلنى عن إنى أبنى بيتى .. بيت أحتمى فيه
وما حدش يضربنى فيه ..

فؤاد : (بجانب حطام الطبله) أنا طبال .. كل
اللى انا عايش علشانه واللى اعرفه إنى
أطبل .. من غير طبله .. أموت ..
(فؤاد يقع على الأرض مغشيا عليه
كأنه مات)

(ميمى تترنح فى مشيتها وقد اشتد بها
الإرهاك والدماء تغطيها ، ثم تجلس على
الأرض)

ميمى : أنا عايزه دراعى اللى أخذوه .. عايزه دمسى

اللى شربوه .. عايزه حد يجرى بي
وراهم .. عايزه رصاص اضربه زى
الرصاص اللى انضربت بيه .. عايزه ارجع
اعيش .. أعيش .. مين اللى حا يخلينى
اعيش ..

(يخرج أمام الجمهور مقدم البرنامج
وهو يسير مستندا على عكاز ، وثيابه
ممزقة ، وفى وجهه جرح ، ورأسه
مضمد) .

مقدم البرنامج : طبعا كلنا عارفين ان اللى حصل لميمى
حصل لنا كلنا .. لكل اللى كانوا معاها ..
هناك فى الصحراء .. بس انتم ما كنتوش
معاها .. كنتم قاعدين تتفرجوا .. المهم ..
الرواية لسه ما خلصتتش .. لسه قدامنا
كثير .. واحنا دلوقتى فى سنة ١٨٨٢ ..
آسف .. سنة ١٩١٢ .. آسف .. احنا فى

سنة ٣٠٥ هجرية .. آسف .. حانرجع
تاني تملخبط في التاريخ .. مش مهم احنا في
سنة كام . ولا في شهر كام .. يمكن نكون
في شهر محرم ولا شهر أمشير ولا أيلول ولا
يناير .. مش مهم .. المهم حالتنا دلوقت ..
لازم نلاقى نهاية للمسرحية .. يا ترى نبتدى
نضرب اللي ضرب ميمى .. والا ناخذ
ميمى ونرجع الكباريه الأخضر .. ويا ترى
لو رجعت ميمى للكباريه حتقدر ترقص
وهي ناقصة حنة .. والا لازم نشوف لها
رقصة جديدة .. رقصة بدراع واحد ..
رقصة والرقاصة مجروحة .. لازم نفكر ..
كلنا نفكر .. والفصل التاني حيتدى ..
بس احب اقول لكم إن لما الفصل التاني

يبتدى ما حدش فيكم حايقعد يتفرج ..
كلكم حتشتغلوا معانا .. كلكم حااتطلعوا
على المسرح .. علشان المسرحية تنجح .
سيداتي وسادتي .. قزقزوا لب ..
وكلوا شيكولاته .. لغاية ما الفصل الثاني
يبتدى ..

(تطفأ الأنوار)

الدراجة الحمراء

المشهد الأول

(صالة المسرح التي تجمع جمهور المتفرجين
يشملها ديكور المشهد الأول .. وهو ديكور
قاعة محكمة تجمع في بيانها بين الفن
الريفى ، — أى جدران من الطين وسبقان
النخيل — وبين الفن الفرعونى القديم ، والفن
الرومانى ، والفن الأوروبى القديم ، ثم الفن
المودرن .. ويبدو هذا الجمع بين الفنون فى كل
أنحاء القاعة وفى كل قطع الأثاث) .

* * *

(يخرج من خلف ستار المسرح رجل
عجوز ذو لحية كبيرة بيضاء الشعر ،
ويرتدى الزى الذى يرمز به إلى

التاريخ) .

التاريخ : (في صوت عال) محكمة ..
(يبدأ ستار المسرح في الانفتاح ،
ولكن التاريخ يلتفت إلى خشبة المسرح
ويصيح وهو يشير إليه بيديه) .

التاريخ : اقل .. لا تفتح الستار .. اقل ..
(ثم يلتفت التاريخ إلى جمهور
المتفرجين وهو ساخط غاضب) .

التاريخ : المفروض لما اعلن عن بدء المحاكمة أن
يقف كل اللي قاعدين انتظارا لدخول
القضاة ، احتراماً لهم .. وانا ما شفتش ولا
واحد فيكم قام وقف .. يعنى ما فيش ولا
واحد فيكم عايش فى القضية .. كلكم
حاسين انكم بتفرجوا .. بتفرجوا وبس ..
وده اللي بنحاول اليومين دول اننا نغيره ..
بنحاول انكم تعيشوا معنا مش تفرجوا

علينا .. إذا كان ده تمثيل تمثلوا معنا ..
وإذا كان لعب تلعبوا معنا .. وإذا كان عمل
وتعب ، تعملوا وتعبوا معنا .. والمخرج
الجديد مصمم على إن الجمهور ما يفضلش
طول عمره جمهور متفرج ، لازم يعيش
جوه المسرحية ، عشان كده رسم الديكور
بحيث يمتد حوالكم .. بصوا حوالكم ..
انتم مش قاعدين فى صالة متفرجين .. انتم
قاعدين فى قاعة محكمة .. لكن يظهر ان
مافيش فايده .. أنا يائس .. عشت معاكم
خمسة آلاف سنة وأنا يائس .. لا .. أيام
أحمس ما كنتوش بتتفرجوا ، كنتم عايشين
معاه فى مسرحيته مع الهكسوس .. وأيام
سنة ١٩١٩ برضو ما كنتوش بتتفرجوا ..
اشتغلنا مع الممثلين وتعبنا معاهم على
المسرح .. بعد كده ما اعرفش حصل
(لا أستطيع ..)

إيه .. انما رجعتم تفرجوا .. لأ .. أنا
عارف حصل إيه .. حصل انكم سبتم
الممثلين يتفرجوا على بعض وقعدتم انتم
تاكلوا .. فات عليكم عشرين سنة
بتاكلوا .. كفاية .. كفاية أكل .. الأكل
اللى بتاكلوه ما يشبعش ده أكل يجوع ..
وحاتفضلوا تاكلوا لما تلاقوا نفسكم
بتموتوا من الجوع ..

سيداتي ، أنساتي ، أنا آسف .. يمكن
أكون ظلمتكم .. انما انا شايل فى قلبى
صفحات كثير .. وكل اللى قرينوه فى
الكتب ، مش كل اللى شايله فى قلبى .. فيه
حاجات كثير انا بس اللى عارفها .. وكل
اللى باقوله مجرد أمثلة .. وانتم عشتم كثير
على المسرح زى ما عشتم كثير بعيد عن
المسرح .. انما اللى مخيلنى أتحمس

اليومين دول ، إن المخرج الجديد مصمم
على انكم تشتركوا فى المسرحية ، واذا ما
اشتركتوش حايقفها .. حايطل .. تعالوا
نبتدى من جديد ..

(يعود التاريخ إلى خلف ستار
المسرح ، ويسود القاعة صمت تام ،
وبعد دقيقة ونصف ، يخرج التاريخ من
خلف الستار ويفتح الستار)

: محكمة ..

التاريخ

(يقف كل جمهور الصالة فى احترام
كبير ، ويفتح الستار) .
(ديكور المسرح مكمل لديكور صالة
المتفرجين أى يجمع كل فنون التاريخ من
الناحية المعمارية ، وناحية الأثاث .. وفى
نهاية صدر المسرح أقيمت منصة
القضاه ، وعن يسار المنصة أقيمت قضبان

مختلفة النوع بعضها قضبان حديدية ،
وبعضها قضبان خشبية ، وبعضها قضبان
من الحجارة ، ويقف خلفها أربعة من
المتهمين ، وعلى يمين المنصة مقعد
المدعى العام ، ثم مقاعد الحضور من
أقارب المتهمين وأصدقائهم والمحامين ،
موضوعة بحيث تكون ظهورهم
للمتفرجين ، حتى يبدو المنظر كأنه امتداد
لقاعة واحدة) .

(والمتهمون الأربعة ، يبدو رئيسهم
مهيبا وهو يرتدى جاكته الأوروبية ، فوق
جلباب قروي أحمر ، ومن تحت الجلباب
الأحمر يرتدى بنطلونا « بلوجينتر » وعلى
رأسه عمامة كبيرة) .

(والمتهم الثاني يبدو قصير القامة ،
فوق كتفيه رأس كبير له ست عيون كل

عينين متجاورتين .. عينان وتحتهما
عينان ، ثم تحتها عينان .. وعلى كل
جانب من جوانب الرأس ثلاث آذان تحت
بعضها) .

(والمتهم الثالث متوسط القامة له
لسان طويل يتدلى حتى صدره ، وينتهي
بميكروفون كبير) .

(والمتهم الرابع ضخم الجثة ، بارز
العضلات ، وفي يده كراباج ، ومعلق في
جانبه خنجر ومسدس) .

(كل من على المسرح وقف بعد أن
أعلن التاريخ بدء المحاكمة) .

(يدخل المدعى العام ويقف بجانب
المقعد المخصص له ، وهو لا يزال في
صباه ، ويبدو أنه لا يتجاوز الخامسة
عشرة من عمره) .

(ترتفع همهمات يسن حضور المحكمة وهم يتطلعون إلى المدعى العام ، وكأنهم فوجئوا به) .

(يدخل القضاة الثلاثة .. الثلاثة من الصبية الذين لا يتجاوز أكبرهم الخامسة عشرة من عمره .. وترتفع همهمات الحضور أكثر) .

(يجلس القضاة ، ويجلس بعدهم كل من فى القاعة ، والهمهمات مستمرة حتى تصبح ضجيجا) .

(المتهم الأول يشير بأصبع يده إلى المتهم ذى العيون الست ، وهذا يلتفت إلى أحد الجالسين فى القاعة ، ويغمز له بعين واحدة تتحرك فى ذبذبات متتالية كأنها تطلق إشارات والجالس الذى وصلته الإشارة ينحنى ويهمس فى أذن

الشخص الذى يجلس بجانبه وهذا يهمس
فى أذن جاره) .

(وفجأة يدوى التصفيق فى قاعة
المحكمة)

(رئيس المحكمة تبدو عليه الدهشة
بعد أن سمع التصفيق كأنه فوجئ به ، ثم
يميل على زميله القاضى عضو اليمين كأنه
يتشاور معه ، ثم يتشاور مع عضو اليسار ،
ثم يواجه جمهور القاعة ، ويخبط على
حافة المنصة التى يجلس إليها بالقدم
الخشبي الذى يخصص للقضاة ليستعينوا
به فى إدارة الجلسة ، ويسكت الحضور
ويتوقف التصفيق فجأة بمجرد أن يخبط
القاضى بالقدم) .

رئيس المحكمة : لماذا تصفقون .. إنكم لا تعرفوننا .. ولا
شك أنكم دهشتم وفوجئتم عندما رأيتم أن

أعضاء المحكمة كلهم في بداية الشباب ..
صغار في السن .. وقبل أن تعرفونا ، وقبل
أن تفهموا سر اختيارنا لتولي محاكمة
المتهمين ، صفقتم ، لأنكم تلقيتم أمرا
بالتصفيق .. إن المحكمة لاحظت عملية
إعطاء الأوامر بالتصفيق .. والتصفيق الذي
يقع بناء على إصدار أوامر .. أو الذي يقع
دون مسيبات ومبررات تتطلب التصفيق ،
يعتبر رشوة .. ولذلك .. فإن المحكمة
تتهم كل من شارك في التصفيق بمحاولة
رشوة القضاة ، وقد يكون بينكم من صفق
انقيادا لشهوة التصفيق ، أو انسياقا وراء
قيادة المصفيقين وهو ما يعتبر إحدى العادات
الشعبية التي تكشف عن إحدى نقاط
الضعف الشعبي ، وهؤلاء توجه إليهم
المحكمة تهمة الجهل .. والمحكمة

تصدر أمرها إلى رجال الحرس بإخراج كل من صفق من القاعة ، وتسجيل أسمائهم ، لإعادة محاكمتهم بتهمة محاولة تقديم الرشاوى أو بتهمة الجهل ..

(يتحرك رجال الحرس المخصص لقاعة المحكمة ويقبضون على كل من صفق ويقودونهم إلى خارج المسرح)

رئيس المحكمة : (يتسم فى مرارة بعد أن تم إخلاء القاعة من المصفقين) إن عدد المصفقين كبير .

(يعود رئيس المحكمة ويتشاور مع عضو اليمين وعضو اليسار ، ثم يعتدل مواجهها الجمهور ، يخبط بالقدم على حافة المنصة)

رئيس المحكمة : قبل أن تبدأ المحاكمة ، أحب أن نشرح للحاضرين كيف تم اختيارنا .. فالقضية كما تعلمون قضية كبيرة واسعة تشمل

آثارها الماضي والحاضر والمستقبل .. وقد قام تساؤل أساسي استغرقت مناقشته ساعات طويلة عند تشكيل هيئة المحكمة .. وكان التساؤل هو ، من يتولى المحاكمة ؟ .. هل يتولاها الماضي ، أو يتولاها الحاضر ، أو يتولاها المستقبل .. وكان لكل جانب مؤيدوه وحجته .. فالماضي هو الذي يستطيع أن يقدر بدقة مدى الانهيار الذي أصاب القرية ، لأنه سبق له أن عاش أيام المجد .. عاش أيام الفراعنة ، وعاش أيام الانتصارات الإسلامية ، وعاش أيام الانتصارات على حملات الصليبيين .. فهو القادر على أن يكشف الأسباب التي أدت إلى ضياع كل هذا .. قادر على أن يقول بماذا كنا كذا ، وأصبحنا كذا .. ولكن هذه الحجة رفضت لأن العودة إلى الماضي

أشبه بزيارة القبور . والميت في قبره مهما كان عظيما في حياته فهو لم يعد يساوى إلا قيمة الذكريات ، ومدى ما يمكن أن تؤثر هذه الذكريات على بناء الشخصية . أى أن كل قيمة الماضى محصورة فى الدراسات التى يستعين بها العقل فى عمليات الخلق الجديد .. ولو أن الميت عاد إلى الحياة وخرج من قبره فربما فاجأته الدنيا بما تطورت إليه فلا يستطيع أن يستعيد مجده ولا عظمته التى سبق أن حققها ، لأنه يكون فى حاجة إلى دراسة لحياة أخرى لم يعيشها .. ورغم ذلك فإن كثيرا من المثقفين لا يكتفون بدراسة الماضى بل يعيشون فيه ، أى أنهم يعيشون فى القبور ، وهو أحد الأسباب الرئيسية لنكبتنا .. ولهذا تقرر رفض اقتراح أن يتولى الماضى محاكمة

المتهمين ..

أحد الحاضرين : ده الماضي بركة ..

رئيس المحكمة : البركة هي تعبير عن معنى الاتكال .. اتكال

على قوة لا نملكها وليست في أيدينا ..

الاتكال على المجهول .. على الغيبات ..

ونحن هنا لنقيس كل شيء بقوتنا الذاتية التي

نعرفها ونستطيع أن نسيطر عليها

ونحركها .. إن شعار البركة هو دعوة لإلغاء

العقل .. والذي يتولى هذه المحاكمة هو

العقل ..

(تدور بعض الهمسات بين

الجمهور ، ويخبط رئيس المحكمة

بالقدوم على المنصة ، فيعم الصمت) .

رئيس المحكمة : لنستمر .. لقد نوقش بعد هذا اقتراح بأن

يتولى الحاضر مهمة محاكمة المتهمين ..

. وكانت الحجة هي الاحتفاظ بوحدة

وسلامة الكيان القائم للقرية .. وبما أن الحاضر هو الكيان وهو النظام . فليتول أمر نفسه .. وكان الرد على هذه الحجة قائما على أن الحاضر هو المتهم ، ولا يمكن أن نعهد إلى المتهم بمحاكمة نفسه .. وصحيح أننا حصرنا المتهمين في أربعة أفراد ، ولكن هؤلاء الأربعة هم صورة الحاضر القائم ، وكل ما في الحاضر تابع لهم ومن صنع أيديهم ، ولذلك فلا يصلح الحاضر لتولى المحاكمة ..

أحد الحاضرين : (من أقارب المتهمين) طيب بأه ما تجيوا كل الناس اللي عايشين في البلد وتحاكموهم .

رئيس المحكمة : (يخطط على المنصة بالقدم) ليس لأحد حق المقاطعة ، وإلا اعتبرنا المقاطعة نوعا من التشويش المقصود على سير

المحاكمة .. ورغم ذلك فردا على ما تقوله
يجب أن تعلم أن الناس هم ملك لتأثير
وسلطة القيادات ، ومحاكمة القيادة هي
محاكمة للناس كلهم ، وتغيير القيادة — لو
حدث — هو تغيير لحالة الناس .. إن القيادة
ينص القانون هي الفاعل الأصلي ، ولكن
الفاعل الأصلي لا يعفى بقية الفاعلين من
المسؤولية .. وبقية المسؤولين هم الشعب
كله .. والشعب ينقسم إلى طبقة جاهلة —
والجهل كما سبق أن أعلننا يعتبر جريمة
تستوجب المحاكمة — وإلى طبقة أخرى
منافقة ومستفيدة وهذه أيضا متهمة .. وإما
طبقة متباعدة جبانة ، والجبن والتباعد عن
المسؤولين هما أيضا جريمة تفسرض
العقاب . ولكننا نبدأ اليوم بمحاكمة الفاعل
الأصلي ، ثم نرقب بقية الفاعلين فيما أن

يتطوروا إلى شعب جديد بعد التخلص من
الفاعل الأصلي ، وإما أن تبدأ محاكمة كل
من لا يتطور ..

(مهمة بين الجالسين ، ورئيس
المحكمة يخطب على المنصة بالقدوم) .

رئيس المحكمة : الصمت من فضلكم .. ونستمر في
موضوع تشكيل هيئة المحكمة .. فقد كان
الاقتراح الأخير الذي نوقش هو أن يتولى
المستقبل مسؤولية المحاكمة .. وكانت
الحجة الرئيسية لهذا الاقتراح هي أن
المستقبل هو صاحب المصلحة الحقيقية
والكاملة في هذه القضية ، وهو الذي
يتحمل آثارها .. كما أن المستقبل ليس
متأثراً بعقوبة الماضي ولا يحمل مسؤولية
الحاضر .. فالتأثر بالماضي والتعلق به هو
ملجأ الفارغين المنكوبين الذين يعجزون

عن البناء الجديد ، وجيل المستقبل لم يتعرض بعد لهذا الفراغ والعجز ، ونأمل ألا يتعرض لهما ، وكما لأنه أيضا جيل لا يحمل مسؤولية الحاضر فهو متحرر منه بحيث لا يمكن أن يتأثر به في إحكامه تأثرا مشبوها بالنفاق أو الاستفادة .. وهكذا ..

تقرر أن يتولى المستقبل مهمة محاكمة المتهمين .. وقد تم اختيار هيئة المحكمة على أساس أنهم يمثلون المستقبل ..

(المتهم الأول أمر الله أبو الروس يتحنح ويقوم واقفا في قفص المتهمين ، ويرفع يده مستأذنا من رئيس المحكمة في الكلام) .

أبو الروس : (في صوت هادئ وقور) يا سيادة القاضى .. لقد تفضلتم وفسرتم لنا أسباب ودوافع ومنطق تشكيل المحكمة ، ولكن

ينقصنا أن نعرف ، إذا لم يكن لديكم
اعتراض ، من الذى أمر بتشكيل
المحكمة ..

رئيس المحكمة : (بسرعة) المؤلف ..

(مهمة صاحبة من جميع
الحاضرين ، والرئيس يخطب بالقدم
الخشبي على حافة المنصة) .

رئيس المحكمة : ماذا .. ألا تفهمون .. لماذا هذا
الصخب ؟ ..

المتهم أبو الروس : لو سمح سيادة القاضى .. أنا فعلا لم
أفهم .. ماذا تقصد سيادتكم بأن المؤلف
هو الذى أمر بتشكيل المحكمة ؟

رئيس المحكمة : يبدو أن الذى لا تفهمه فعلا هو معنى صفة
وكلمة المؤلف .. إن كل الذين صنعوا
التاريخ مؤلفون .. وكل الذين صنعوا
الأحداث مؤلفون .. وكل القادة السياسيين
(لا أستطيع ..)

والاجتماعيين والعسكريين مؤلفون .. هتلر
لم يكن سوى مؤلف .. ونايليون مؤلف
واسكندر المقدوني وصلاح الدين كلاهما
مؤلف .. إنك تحاول أن تحصر صفة
المؤلف في كاتب القصة أو الرواية .. إنه
فعلا مؤلف ولكن الآخرين أيضا مؤلفون ،
والفرق هو أن كاتب القصة يؤلف قصة ومن
حق الناس أن تقرأها أو لا تقرأها .. تقبلها أو
ترفضها .. ولكن مؤلفي أحداث التاريخ ،
ومؤلفي كيان الأمم يحرمون الناس من حرية
القبول والرفض .. إنهم لا يفرضون آراءهم
على خيال الناس كمؤلف القصة ، ولكنهم
يفرضونها على واقعهم .. وهم لا يكتبون
كلمات ولكنهم يبنون مؤلفاتهم في واقع
بكل وسائل البناء .. وهذا الفرق يبدو
واضحا بين كارل ماركس ولينين ،

فماركس كان مؤلفا ولكنه كان يضع آراءه
وخياله فى كلمات يجمعها فى كتاب .. من
حق الناس أن تقرأ أو لا تقرأ .. ومن حق من
يقرأ أن يقتنع أو لا يقتنع .. وجاء لينين وأخذ
هذه الآراء وبدأ يؤلف بها نظاما ودولة ..
ورغم أن أسس الخيال واحدة من الاثنين ..
إلا أن مؤلفات لينين تختلف اختلافا كبيرا
عن مؤلفات ماركس .. وربما لو عاد
ماركس إلى الحياة ورأى الواقع الذى ألفه
لينين لقال إن هذا ليس من تأليفى ، وهو ما
اعترف به كل من قرأ مؤلفات ماركس
واقنعوا بها ، ولهذا فهم يقولون إننا لم نصل
إلى الشيوعية بعد .. وأخيرا .. وبعد كل
هذا الشرح الطويل ، فأنت مؤلف .. وكل
ما حدث فى القرية على أيامك كان من
تأليفك .. ولذلك فالذى يحاكمك هو

مؤلف أيضا .

أبو الروس : أنا لم أفرض خيالي وآرائى على الواقع ،
ولكن الواقع هو الذى حدد وسيطر على
خيالى وآرائى ..

رئيس المحكمة : هذا ما سيكشف عنه التحقيق
والمحاكمة ..

أبو الروس : إن القانون يعطينى حق رد المحكمة .. وأنا
أردها لأنها مؤلفة من جيل لم يكبر وينمو
بعد حتى يستطيع أن يلم بالأحداث أو
يستوعب الواقع بحيث يستطيع أن
يحاسبنى ويحاكمنى على هذه الأحداث
التي جرت والواقع الذى عشت فيه .. إنى
أطالب بأن يتولى محاكمتى الجيل الذى
استكمل دراسته ، حتى أطمئن ويطمئن
الناس كلهم إلى أن أحكامه قائمة على
دراسات وبحوث وعقلية ناضجة .

رئيس المحكمة : تقصد أن يتولى الحاضر محاكمتك ، لا
المستقبل ..

أبو الروس : أقصد ما قلته ..

(يتشاور رئيس المحكمة مع عضوى
اليمين واليسار فى همسات غير
مسموعة ، ويدو عضو اليمين محتدا
غاضبا كأنه على خلاف مع رئيس
المحكمة وعضو اليسار)

رئيس المحكمة : توقف الجلسة إلى حين النظر فى طلب رد
المحكمة ..

(يقوم القضاة الثلاثة والمدعى العام
ويتجهون خارج المسرح إلى غرفة
المداورة)

(ترتفع الأحاديث بين الجمهور
وبصوت عال)

أحد الحاضرين : (وهو ينظر إلى المتهم الأول) والله جدد

يا ابو الروس برضه عارف تقف لهم ..
أحد أفراد الجمهور : (في صالة المتفرجين لزميل له) ما فيش
فايدة .. مش ممكن حد حايقدر عليه ولا
المحكمة ..

متفرج آخر : الطريقة الوحيدة انهم يسيبوه لربنا .. ما
حدش يقدر عليه إلا الله.

(المتهم الثاني عبد السميع أبو العينين
الذى يحمل في رأسه ست عيون وست
آذان .. يشير بإحدى عيونه إلى أحد
الجالسين، فيدير الجالس ظهره له كأنه
يرفض أوامره)

الجالس : (الذى يدير ظهره) ابعده عنى يا ابو
العينين .. كفاية اللي جرى لى ..

(المتهم الثالث عبد العليم أبو جهل
الذى يتدلى لسانه الطويل ويحمل فوق
صدره ميكرفون، يتنحج بصوت عال
يملاً الصالة كلها ليلفت الانتباه إلى أنه

سيتكلم)

أبو جهل : لإخواني .. يجب أن نعلم أننا نجتاز مرحلة

حرجة في تاريخ قريتنا ، إن ..

(أصوات تقاطعه من جميع جوانب

المسرح والمقاعد) .

اسكت ..

كفاية كلام .. من كثر ما تكلمت

سديت ودانا .. أبو لسان طويل اهوه ..

(المتهم الرابع عبد القوى قوى الذى

يحمل سوطا فى يده ، يرفع السوط فى

الهواء ، فيسكت الجمهور كله مرة

واحدة) .

عبد القوى : ما تخافوش .. أنا بس بافكركم ..

أحد الحاضرين : ما خلاص .. راحت عليك ولا يهتمكم يا

جماعة ..

(الرجل الذى يمثل التاريخ يدخل ،

ويقف وراء المنصة ، ويصيح)

التاريخ : محكمة ..

(يسود الصمت على المسرح
والقاعة ، ويقف الحضور كلهم ، ويدخل
أعضاء المحكمة ويجلسون حول
المنصة)

رئيس المحكمة : بناء على ما سبق أن أعلنته المحكمة من
حيثيات تشكيلاها ، وبما أن المستقبل هو
صاحب القضية ، وبما أن القضاة يمثلون
الجيل الذي لم يتعرض بعد للإغراءات
الذاتية الاستغلالية ، وبما أن إصدار تشكيل
المحكمة هو حق من حقوق المؤلف ،
لذلك فقد حكمت المحكمة برفض طلب
الرد المقدم من المتهم الأول ..

(تصفيق حاد)

رئيس المحكمة : (مبتسما) من حقكم الآن أن تصفقوا ،

لأن التصفيق الآن لا يعتبر رشوة ولكن يعتبر
إبداء رأى بالموافقة ..

(يتكرر التصفيق)

رئيس المحكمة : المدعى العام يتلو قرار الاتهام ..

(يقف المدعى العام وفي يده أوراقه)

المدعى العام : المتهم الأول أمر الله أبو الروس المستول

عن مستقبل قرية التل الأخضر .. أنت متهم

بأنك طوال فترة تحملك المسئولية ألغيت

وأبعدت واضطهدت جميع العقول التى

يعتبر من حقها ومن واجبها أن تساهم معك

فى بناء المستقبل ، وحصرت كل السلطات

فى يد الثلاثة المتهمين معك وهم المتهم

الثانى عبد السميع أبو العينين الذى عهدت

إليه بمراقبة أهالى القرية ، والمتهم الثالث

عبد العليم أبو جهل الذى عهدت إليه بإلقاء

خطبة الجمعة وإذاعة كل ما يخص القرية من

أنباء تهم الأهالي ، والمتهم الرابع عبد
القوى قوى الذى عينته شيخا للخبراء
وسلمته جميع الأسلحة التى تملكها القرية
والتي تشمل عشر بنادق وعشرين طبنجة
ومائة وخمسين سوطا من ذبول البقر ،
وكانت نتيجة حصر السلطات بين هؤلاء
الثلاثة دون أن يكون بجانبهم سلطات
للعقول المفكرة التى تستطيع أن تفكر
وتخطط وتبنى للمستقبل ، أن أساء الثلاثة
استغلال السلطة من تحت السلطة الأكبر
التي تمثلها أنت . . ولذلك صدر قرار بأن
يتولى المستقبل التحقيق معك على أن تقوم
بهذا التحقيق هيئة قضائية علنية ، تتولى بعد
الانتهاء من التحقيق محاكمتك ، وذلك
طبقا للدستور الذى ينص فى المادة الخامسة
عشرة على أن يتولى المستقبل التحقيق مع

الحاضر ومحاكمته ، وهو الدستور الذى لم ينته المؤلف من استكمال بقية مواده حتى يعلنه .

(يضع المدعى العام أوراقه ويجلس)

(تثار همهمات ويخبط رئيس

المحكمة بالقدوم الخشبي) .

رئيس المحكمة : المتهم أمر الله أبو الروس .. ما هي أقوالك ؟

أبو الروس : يا حضرات القضاة .. إن كل ما فهمته من

قرار الاتهام هو أنى متهم بأنى لم أشرك

العقول المفكرة فى المسئولية .. فإذا كان

هذا هو كل الاتهام ، فإنى أستحلفكم بالله

وبحق مستقبل قرية التسل الأخضر أن

تخبرونى كيف يمكن تحديد أو اختيار

العقول المفكرة التى تحمل المسئولية ..

وأنا واثق أن كل ما يمكن أن يخطر على

بالكم من وسائل .. سبق لى أن اتبعنها
ولجأت إليها .. ولعلكم تعلمون أو على
الأقل مؤلفكم يعلم أنى عندما وجدت نفسى
مسئولا ، أو حتى أكون أكثر صراحة ،
عندما جعلت نفسى مسئولا ، بدأت
بمحاولة الاعتماد على العقول المفكرة فى
القرية ، وقضيت أياما وشهورا وأنا أضيع
وقتى فى مناقشات لا تنتهى مع البارزين فى
قربتنا من الشيوخ والشباب .. وخيب أملى
أن كلا منهم كان يتحدث عن نفسه ، وعن
أحلامه بالنسبة لنفسه .. كلا منهم بلا
استثناء كان يبدأ المناقشة بسرد طويل
لتاريخه فى القرية ، ثم ينتقل إلى محاولة
وضع نفسه فى مركز من مراكز السلطة ..
كلا منهم يبدأ وينتهى حديثه بكلمة أنا ..
أنا .. أنا .. كلهم أنا ، وبعد أن يئست

قررت ألا يكون في القرية إلا أنا واحد ..
وهو أنا ..

المدعى العام : أى أنك تعترف بأنك استأثرت بالسلطة ..

أبو الروس : إنه ليس استئثارا بالسلطة ولكنه نتيجة حتمية

لعملية اختيار العقل المسئول .. لقد كنت

أقارن بين عقلى وعقل كل من اجتمعت

بهم ، فأجد عقلى يتجه إلى أبعد بكثير مما

تتسع له عقولهم ، إلى درجة أن ليس هناك

عقل يستطيع أن يرتفع إلى مستوى عقلى

ليعاوننى فى تحمل المسئولية ، والدليل أن

هذه العقول ذاتها كانت موجودة فى القرية

من قبل أن أتحمل المسئولية .. فمن الذى

قاوم العمدة السابق واستطاع أن يخلص

القرية من مظالمه وجشعه ؟ عقلى أنا ..

ومن الذى قاوم الإغراءات الكثيرة التى كان

العمدة السابق يفرى بها كل من يقترب

منه ؟. أنا .. عقلى أنا .. ثم من الذى استطاع أن يصل إلى المسئولية ويتحملها ؟. عقلى .. لو كان هناك عقل آخر أذكى وأنبه من عقلى لكان صاحبه اليوم هو الذى يتحمل مسئولية القرية وأراحنى .. فهو ليس استثناءا بالسلطة ولكنها مجرد مقارنة بين مستوى عقول أهل القرية .. وهذا العقل الذى تخلص من الماضى ، وتحمل الحاضر ، هو الذى يستطيع أن يبنى المستقبل ..

المدعى العام : إن عيبك أنك تربط العقل بالسلطة ..

أبو الروس : وما هو الفرق ؟

المدعى العام : الفرق أن العقول تختلف فى

اختصاصاتها .. إن عقول الناس

كوجوههم .. كل وجه له شبه خاص ،

يميزه ويعرف به ويحدد شخصيته ،

وكذلك كل عقل له شبه أو قدرة خاصة تميز صاحبه ، حتى لو افترضنا أن مستوى نضج وثقافة كل العقول واحد .. فالعقل الذى يستطيع أن يمارس الطب مثلا غير العقل الذى يستطيع أن يمارس الميكانيكا ، وغير العقل الذى يستطيع أن يمارس فن الرقص .. وكذلك العقل الذى يستطيع أن يمارس التخطيط .. إن بناء القرية كبناء العمارة ، عقل المهندس المعماري يخطط ويرسم ، وعقل المقاول ينفذ الخطة والرسم اللذين وضعهما العقل الأول . وأنت مسئوليتك فى القرية هى مسئولية المقاول الذى ينفذ الخطة ، ولكنك جعلت من نفسك مهندسا ومقاولا .. استأثرت لنفسك بوضع الخطة وتنفيذها ..

أبو الروس : مقاول يعنى إيه ؟. يعنى أن أوقف تفكيرى

على أى خطة توضع لى ..

المدعى العام : لا .. إن المقاول ينفذ الخطة بعد أن يناقشها

مع المهندسين .. وإذا وضع هو هذه الخطة

فهو يعرضها أولا على المهندسين ..

أبو الروس : لقد قلت لكم إنى حاولت الاستفادة من

عقول القرية ، فلم أجد العقل الذى

يفيدنى ..

المدعى العام : لأنك أنت الذى كنت تختار العقول التى

تناقشها ، وتدعوها إلى مقر السلطة لتجتمع

بك .. وهذا هو ما كان يعد عنك بقية

عقول القرية ، وهذا ما كان يجعل السلطة

هى التى تسيطر على انطلاق كل عقل ..

أبو الروس : وماذا كان يمكن أن أفعل ؟

المدعى العام : كان يجب أن تترك الناس تتكلم بلا دعوة

منك .. من السلطة .. يتكلمون فى

الحوارى وفوق المصاطب ..

أبو الروس : هل تعتقد أن كل عقول أهل القرية في مستوى عقول المهندسين الذين يضعون المخطط ؟.

المدعى العام : إذا لم يكونوا مهندسين ، فهم أصحاب ملك .. أصحاب الأرض .. وصاحب الأرض هو الذى يحدد للمهندس ما يريد ..

أبو الروس : صدقونى .. إن أهل القرية كلهم يتكلمون .. وقد كان أول مسئوليات عبد السميع أبو العينين ، هى أن يسمع ويرى كل ما يقال ويحدث فى القرية لينقله إلى بالنص .. يوماً بيوم .. وصدقونى إنى إلى اليوم لم أجد قى كل ما يقال اقتراحا لعمل جديد ، أو حلا لمشكلة من المشاكل .. أبدا .. كله نقد .. وسخط .. كلام .. مجرد كلام لا يؤدى إلى شىء .. طيب يا (لا أستطيع ..)

ناس عايزينى أعمل إيه ؟. ما تقولوا ..
سمعونى ..

المدعى العام : إن مجرد الكلام .. أقصد مجرد المعارضة
وعدم الرضاء ، يؤدي إلى اكتشاف أوجه
الإصلاح وطرق التقدم .. ثم إنك نسيت
شيئا .. لقد كانت مسئولية عبد السميع أبو
العنين ، أن ينقل إليك كلام الناس ، ولكن
كانت أيضا مسئولية عبد القوى قوى هي أن
يضرب كل من يقول كلاما لا يعجبك ..
وقد ضرب أفرادا كثيرين من أهل القرية ،
حتى كف الناس كلهم عن الكلام خوفا من
عبد القوى قوى ، وبدعوا يكتفون
بالهمس ، ولكن عبد السميع أبو العنين
كان يستطيع أيضا أن يصل إلى الهمسات ،
فكف الناس عن الهمس ، بل كفوا أيضا عن
الاجتماع بعضهم وبعض .. انظر إلى

مصاطب القرية التي كانت تزدحم كل مساء
بالأهالي يتكلمون ويضحكون ، لقد مضى
عليها ليال طويلة وهي خالية ..

أبو الروس : لم أضرب أحد لأنه تكلم .. اللي انضربوا

هم من كانوا يسعون إلى خراب البلد ..
كانوا يكذبون على الناس ليشكلوا منهم
عصابات يقودونها للاستيلاء على
السلطة .. ثم كيف تريدون أن أتحمل
مسئولية القرية ؟. أسيب اللي عايز ياكلني
ياكل .. وليس هناك إنسان واحد يستطيع
أن يحمل المسئولية وحده .. كان لازم
يكون لي أدوات .. لازم يكون لي واحد
يسمع لي بودائه ، وواحد يتكلم لي
بلسانه ، وواحد يضرب لي بإيده .. ودول
كلهم مش علشان يحموني ، إنما يحموا
القرية .. لو كنت عايز أحمي نفسي كنت

سيت التل الأخضر ورحلت قعدت في البندر
ولا في المديرية ..

المدعى العام : قلت إنه كان لك من يسمع لك ، ويتكلم
لك ، ويضرب لك ، وكأنك تعترف بأنه لم
يكن لك أحد يفكر لك ، أو على الأقل يفكر
معك ..

أبو الروس : لم أكن في حاجة إلى عقل بجانب عقلى ..
كنت أتحمل مسئولية التفكير وحدى ..
وقادر عليها .. إنكم تنسون .. تنسون كل
ما فعلته للقريه .. تنسون أنى أنا الذى
أدخلت أول سيارة فى عمر التل الأخضر ..
(مهمة بين الحضور ، ويخبط رئيس

المحكمة بالقدوم فيسكت الجميع)

المدعى العام : هذا هو أحد الأخطاء التى وقعت فيها
ويشملها قرار الاتهام .. فلأنك لم تستعن
بعقول تفكر معك ، فقد انقذت وراء

استكمال المظاهر الكاذبة على حساب
المصالح الحقيقية.. واستوردت سيارة ..
ثلاث سيارات .. ولكنك قبل أن تستوردها
وتدفع الثمن الغالى من فلوس الناس لم تفكر
فى أن هذه السيارة تحتاج إلى طريق واسع
مسفلت فى القرية ، وتحتاج أيضا إلى
سفلتة وتوسيع كل حوارى وأزقة القرية ..
وإلى الآن ليس فى القرية كلها شارع ممهد
مسفلت يصلح لمرور السيارات .. وكانت
النتيجة أن هذه السيارات لم تعد تصلح
للاستعمال إلا فى المسافة بين بيتك والسكة
الزراعية . وهى مسافة مترية مليئة بالطين
والمطبات ، فأصبحت تضطر إلى إصلاح
السيارات بين كل أسبوع وآخر ، وتدفع
لإصلاحها مزيدا من أموال الناس ..
وثانيا .. لقد استوردت هذه السيارات دون

أن يكون بين أهل القرية من يجيد قيادة سيارة .. وكانت النتيجة أنك استأجرت سائقين من المديرية ، وعلاوة على مرتباتهم العالية التي يتقاضونها فقد جاء كل منهم معه بعائلته .. ثم بدأ يتوافد على القرية أقرباؤهم ، وكل منهم يبحث عن وسيلة لكسب المال .. أحدهم افتتح مقهى .. أول مقهى في تاريخ القرية .. وثان تزوج بهانة بنت ع شماوى وسيطر على القراريط الثلاثة من الأرض التي ورثتها عن والدها .. إلى آخره .. فكانت النتيجة هي تزايد عدد سكان القرية على حساب مصالحها .. ثم ثالثا .. ماذا فعلت بالسيارات الثلاث .. إن سيارة منها خصصتها لنفسك ، والسيارة الثانية خصصتها لنقل الضيوف الذين لا تكف عن دعوتهم وتنقل معهم احتياجات

الحفلات والولائم التي تقيمها ، ثم السيارة
الثالثة التي كان المفروض أنها سيارة لورى
لنقل إنتاج القرية ، استولى عليها عبد
السميع أبو العينين وعبد القوى قوى وعبد
العليم أبو جهل يتبادلون استخدامها بحجة
متطلبات العمل ..

(تصفيق من جميع الحضور)

(رئيس المحكمة يخطب بالقدوم على

حافة المنصة بعنف)

رئيس المحكمة : إن المحكمة تأمر بعدم التصفيق .. ضعوا
أنفسكم في موضع دراسة كل ما تسمعونه
إلى أن ينتهى .. والدراسة تتطلب الهدوء ..
وأما تصفيقكم فهو يعبر عن الشماتة ..
والشماتة يمكن أن تكون جريمة يعاقب
عليها كجريمة النفاق ..

(يسود الصمت)

أبو الروس : طبعا كل الناس شمتانة .. يا عالم .. هل إدخال السيارات إلى القرية للارتفاع بها إلى مستوى المدنية والحضارة يعتبر جريمة أو خطأ ..

المدعى العام : (وكأنه لم يسمعه) وموضوع السيارات يدفعنا إلى موضوع المطعم الذى أقمته على حافة الطريق الزراعى وأسميته « برج التل الأخضر » .. إن تكاليف إنشاء هذا المطعم كانت تكفى لبناء مدرستين ، تنقذ البلد من الأمية .. والمطعم لا يجذب إلا عددا ضئيلا جدا من الزبائن رغم الفطير المشلتت ، والحمام المحشو بالفريك الذى اشتهرت به القرية .. وأيام عديدة تمر دون أن يدخل زبون واحد .. فينقل الأكل والحلويات إلى بيوت معروفة فى القرية ..

أبو الروس : يعنى مش عايزين تبقوا زى أوروبا .. ده

مستر فاناتيک بتاع الآثار اللي جاى من
أمريكا قال لى إن كل قرية هناك بها مطعم
لخدمة المارين بالطرق الزراعية . الحق
على .. خليكم زى ما اتم ..

المدعى العام : إذا كنت عايز تبقى زى أوروبا كان لازم

تستنى ميتين سنة ، وهو فرق الحضارة بيننا
وبينهم ، والحضارة ليست فى الفرق بين
مستوى العقول ، ولكن كل حضارة هى
شخصية قائمة بذاتها .. وكل شخصية لها
احتياجاتها الخاصة .. يعنى لو كانت
حضارة أوروبا محتاجة برج زى برج إيفل
ويضم مطعما ، فقد تكون الحضارة
الروسية لا تحتاج إلى هذا البرج .. ولكنك
كنت مجرد مقلد ، لدرجة أنك قبل زيارة
مستر مكنتوش للقرية أمرت كل الفلاحين
بأن يلبسوا بنطلونات ، وذهبوا إلى الحقل

بالبنطلون فكانت النتيجة أن عادوا وكل
البنطلونات مغرقة بالطين والماء وممزقة ..
الجلابية هي التي تنفع لأن الفلاح يقدر يرفع
ذيلها ويعلقه في صدره ويشتغل في الطين
برجليه وبعدين يغسل رجليه والجلابية لسة
نظيفة .. شوف في الهند مثلا .. ما لبسوش
بنطلونات لأن الزى بتاعهم هو اللي بيمنع مع
جوهم وشغلهم .. اللي عاوز يلبس يلبس
زى ما يعجبه ، إنما ما يقفأش أمر من السلطة
يلبسوا بنطلونات .. أنت حاولت تقلد
كمال أتاتورك اللي حرم الزى التركي
الوطني وفرض الزى الغربى ، وضع
الشخصية التركية .. ثم إنك أمرتهم بلبس
البنطلونات ونسيت تلبسهم جزم مع إن اللي
يلبس بنطلون في أوروبا يلبس معاه جزمة ..
وكانت النتيجة أن فشل مشروع

البنطلونات ..

أبو الروس : الحق على .. كان لازم أمر الناس انها

تعيش عريانة علشان الهدوم لا تتسخ ..

المدعى العام : (وكأنه لم يسمعه) مستر مكنتوش باع

لك وابور حراثة .. ولا شك أن وابور

الحراثة هو من الآلات الزراعية الهامة ..

ولكن ما مدى حاجة القرية إليه .. إن عدد

أهل القرية كان يكفى لحراثتها ، وبعد آلة

الحراثة تعطل معظم أهل القرية فترات أطول

عن العمل .. وتعطل بجانبهم البقر

والجاموس .. وكان يجب قبل أن تشتري

آلة الحراثة أن تدبر لمن ستعطلهم هذه الآلة

عن العمل الذى يعرضهم ويعرض القرية

عن استغلال طاقتها البشرية ، ثم كان يجب

أن تفكر فى استغلال الطاقة الحيوانية أى

البقر والجاموس بإنشاء مصنع ألبان مثلا ..

ولكنك لم تفكر في شيء من هذا ، بل
وضعت مشروعا لإنشاء مصنع دبايس ..
كل همك المظهر ، و كنت تريد أن تتظاهر
بأن قرية التل الأخضر هي قرية صناعية ..
لا .. إنها ستبقى دائما زراعية .. هل تعرف
ما حدث في جزيرة كوبا .. إن كوبا جزيرة
زراعية أيضا . ولكن ركبها الغرور وتقليد
المظهر وقررت أن تصبح جزيرة صناعية ،
وكان أول مصنع أقامته هو مصنع
إنتاج آلات الكنتور .. أى عدادات النور
والمياه .. وبعد سنوات اكتشفت أن
صناعية العداد الواحد يكلفها ثمن عشرين
عدادا من العدادات التي كانت تستوردها
من فرنسا .. واكتشفت أنها إذا استغنت عن
استيراد العدادات فهي مضطرة إلى استيراد
الخامات التي تصنع منها العدادات ،

وكانت النتيجة أن أغلقت المصنع الذى أقامته وعادت تستورد العدادات من فرنسا .. والحمد لله أن هذا التحقيق قد بدأ قبل أن تبدأ فى إنشاء مصنع الدبائيس ..

أبو الروس : كيف نتقدم إذن .. كيف نرفع المستوى الحضارى والإنتاجى ..

المدعى العام : نتقدم أولاً كبلد زراعى ، والفائض من الإنتاج الزراعى بعد استكماله فى كل الأرض . نستغله فى الصناعة الزراعية ، استغلالاً لا يقوم على توفير الاستيراد من الخارج كمظهر وطنى فحسب ، وإنما يجب ألا تزيد تكاليفه عن تكاليف الاستيراد من الخارج .. المسألة ليست مجرد مظهر وغرور وطنى ومحاولة اكتفاء ذاتى .. المسألة مسألة عقل حسابى ، وليس هناك قرية فى العالم كله يمكن أن تكتفى اكتفاء

ذاتيا .

أبو الروس : يعنى أهل البلد يسيبونها علشان يشتغلوا فى
المصانع اللي فى المدينة .. أسيبهم يهاجروا
ولا أعمل لهم مصانع هنا ...

المدعى العام : إنهم يهاجرون لأن العمل الزراعى ضيق
وليس مستكملا .. لو أنك عملت على
توسيع الرقعة الزراعية ورفعت من دخل
الفلاح كما حدث فى يوغسلافيا لعاد الناس
إلى القرية وتمسكوا بها ..

(رئيس المحكمة يخطب بالقدوم)

رئيس المحكمة : أرجو عدم الدخول فى المناقشات الآن ..
وأطلب من المدعى العام أن يتقل إلى النقطة
التالية من قرار الاتهام .

المدعى العام : المتهم أمر الله أبو الروس حاول فرض نفسه
كفتوة على المديرية كلها وأن يتدخل فى
شئون كل القرى المجاورة .. ودون أن

يستشير العقول التي يمكن أن تحسب له حساب كل خطوة ، سلط عبد السميع أبو العينين ليجمع الأسرار الخصوصية لكل فرد في كل قرية ، وسلط عبد العليم أبو جهل لينشر الإشاعات التي تثير الفتن في القرى المجاورة ، ثم سلط عبد القوى قوى ليضرب كل من يقاومه أو يرفض الخضوع لأمره .. كان أمره كاسمه هو أمر الله ..

أبو الروس : (محتدا) إنني أرفض هذا الأسلوب في توجيه الاتهام .. إن المستقبل يتهم دون أن يدرس واقع الحاضر .. إن هذه العائلات التي تعيش في القرى المحيطة بالتل الأخضر ، كانت تحاول أن تخرب بيت التل الأخضر ، وكانت تتآمر عليّ لتخلص مني لمجرد أن بدأت في إنشاء عالم جديد يخافون أن يكتمل .. هل كنتم تريدون أن

أتركهم يحطمون بلدتنا .. أين المستقبل
الذى تمثلونه وتحدثون باسمه .. إن
المستقبل لا يبنى بالكلمات بل يحتاج أولاً
إلى القوة وإلى الضرب حتى يمهد لنفسه
الطريق ..

المدعى العام : هذا كلام يعبر عن رأيك وحدك .. ولكن
العقول المحيطة بك كانت تعلم أن كثيراً من
القرى التى ضربتها لم تكن تستحق
الضرب .. ثم إن المستقبل قبل أن يضرب
يعتمد على تقوية العلاقات الخاصة التى
يمكن أن تغنيه عن الضرب .. ثم قبل أن
يضرب أن يبنى نفسه ويبنى قوته بحيث
يكون مجرد خوف أعدائه منه كفيلاً. بأن
يغنيه عن الضرب .. ولكنك بدأت تضرب
قبل أن تتم بناء القرية فكان من السهل على
أى عائلة مجاورة أن ترد ضرباتك .. وأخيراً

فإنك حاولت أن تضرب شركة أمريكانوف
التي تملك المصانع المجاورة ، وكانت
النتيجة أن سلطت عليك عصابة
الإسرامبولي وخربت بيتنا ، ولو أنك سألت
واستشرت فربما عرفت أنك لو تفرغت لبناء
القرية أولا إلى أن تحقق كل أحلامها
لأفلست شركة أمريكاموف من تلقاء نفسها
وتخلصت منها المديرية كلها .. ولكنك لم
تستشر أحدا ..

أبو الروس : حتى دى .. يا عالم أمريكانوف كانت
بتاكلنا وكان لازم

(رئيس المحكمة يخطب بالقدوم في
حدا)

رئيس المحكمة : ليس هذا وقت النقاش .. المتهم عبد
السميع أبو العينين ما هي أقوالك ؟
عبد السميع : أنا ماليش دعوة .. أنا عبد المأمور ...

(لا أستطيع ..)

شغلتى أسمع وأشوف .. وانقل اللي اسمعه
وأشوفه ..

المدعى العام : إن تهمتك أنك كنت تنقل أخبارا كاذبة ،
و كنت تخفى أخبارا أخرى .. وكانت لك
دوافع شخصية تدفعك إلى أن تؤذى بعض
الناس عن طريق تسليط أبو الروس عليهم ..

عبد السميع : صدقونى .. لا أحد يستطيع أن يعرف
الكذب من الصدق .. أعرفه ازاي .. كله
كلام .. كان أبو الروس هو اللي يقرر فين
الكذب وفين الصدق .. أنا نفسي ما كنتش
أعرف .. صحيح كان فيه ناس اعرف ان ابو
الروس يكرههم وعائز يخلص منهم ،
و كنت انقل له أخبارا عنهم توديهم في
داهية ، ما كنتش استجرى انى أنقل له
أخبارا تفيدهم أو تؤيد مواقفهم أو تبرأهم ،
كان أبو الروس دبخنى وخلص منى قبل ما

يخلص منهم ..

رئيس المحكمة : المتهم عبد العليم أبو جهل .. ما هي أقوالك ؟

أبو جهل : أنا لسان ... مجرد لسان .. ما ليش عقل .. العقل هو أبو الروس ، كان هو اللي يفكر ويحط أفكاره على لساني ..

رئيس المحكمة : المتهم عبد القوى قوى .. أقوالك ؟

عبد القوى : أنا الذراع .. والذراع ما يتحركش لوحده .. لازم صاحبه يحركه .. وأنا صاحبي هو أبو الروس .. أنا بتاعه .. ما اقدرش اتحرك إلا بأمره .. ده رصاص الكام نديقية والكام طبنجة كان بيثيله عنده في خزانة ما يطلعوش الا لما يأمرني بالضرب .. وبعد الضرب يلم الرصاص اللي فاضل ويرجعه الخزانة .. ما كنتش في إيدي حاجة إلا اني أنفذ الأوامر ...

(أبو الروس ، وقد بدأ ينهار ،
وعلامات السخط والقرف تبدو على
وجهه ويتلفت إلى الثلاثة المتهمين
معده كأنه يهم أن يبصق في وجوههم)

أبو الروس : حتى انتم ... انتم يا من خلقتكم من
العدم .. لا أمان حتى للخالقين (يلتفت إلى
رئيس المحكمة ويتكلم في صوت ضعيف
متواضع)

أبو الروس : سيدي الرئيس .. هل من حقي أن أتكلم ،
أقصد أن أسأل سؤالا يريحني حتى أريح
معي المستقبل الذي يحاسبني ؟

رئيس المحكمة : تكلم ..

أبو الروس : أريد أن أسأل .. هل أنا متهم في وطنيتي

في غيرتي على قريتي ..

رئيس المحكمة : لا .. ليس هذا في قرار الاتهام ..

أبو الروس : هل أنا متهم بسرقة أموال القرية ..

رئيس المحكمة : لا .. إن الاتهام ينحصر في إساءة استغلالك
لشعورك الوطني وإساءة استغلال أموال
القرية ، وكل إمكانياتها البشرية
والاقتصادية ..

أبو الروس : والسبب كما فهمت من كلام المدعى العام
هو عدم اعتمادي على العقول المفكرة في
القرية ..

رئيس المحكمة : هذا صحيح ..

أبو الروس : إذن فأنا أعترف بذنبي .. وأرجو من
المستقبل أن يضع لي خطة وتنظيم وسائل
الاعتماد على العقول المفكرة ..

رئيس المحكمة : هذا يأتي مع إعلان الحكم .

(يتشاور رئيس المحكمة مع عضو
اليمين وعضو اليسار ، ثم يخبط بالقدم
على حافة المنصة)

رئيس المحكمة : ترفع الجلسة للمداولة ..

(تقوم هيئة المحكمة وتخرج من المسرح ، وترتفع أصوات عالية في كل مكان ، بينما يجلس المتهمون الأربعة على المقاعد المخصصة لهم خلف القضبان)

أحد الحضور : دول حايرو حوا في داهية .. مؤكـد
إعدام ..

أحد الحضور : والله عرف يتكلم ..

أحد الحضور : يا جماعة حرام عليكم .. ما تنسوش انه
عمل كثير .. احنا فين وبقينا فين ..

أحد الحضور : احنا مطرح ما كنا ..

أحد الحضور : سمعتم أبو العينين قال إيه ... ولا ابو
جهل .. ولا عبد القوى .. اشمعنى ما
قالوش الكلام ده قبل كده ..

(يدخل التاريخ ويقف خلف المنصة)

التاريخ : محكمة ..

(يقف المتهمون والحضور في صمت)

وترقب ، ويدخل أعضاء المحكمة
ويجلسون على مقاعدهم فيجلس كل من
في المحكمة)

رئيس المحكمة : (بعد أن يخبط بالقدوم) بما أن أبو الروس
هو العضو الأساسي الذي يمثل الحاضر ،
وبما أن المستقبل لا يستطيع أن يعد نفسه
لتحمل المسؤولية إلا إذا اعتمد على
الحاضر ، كما أن الحاضر لا يستطيع أن
يقوم بواجبه نحو المستقبل إلا إذا اتخذه
أساسا منيظرا على تفكيره ، لهذا وبناء عليه
فقد قررت المحكمة :

أولا — اعتبار هذه المحكمة قائمة
ومستمرة يوميا طوال السنوات العشر
الفادمة ابتداء من اليوم ، وهي الفترة التي
يكون بعدها المستقبل قد أصبح حاضرا
يتحمل المسؤولية إزاء المستقبل الأجد ..

ثانياً — يفرض على الحاضر ألا يتخذ أى قرار أو يتحرك أى حركة فى شئون القرية إلا بعد العرض على المستقبل والحصول على موافقته ..

ثالثاً — فى حالة مخالفة الحاضر لهذه الأحكام يعزل عن المسؤولية فوراً ، ويطبق عليه القانون رقم ١٨٦٧ الذى يقضى بالإعدام أو بالأشغال الشاقة المؤبدة فى حالة الاعتداء على المستقبل .

رابعاً — إذا عزل جيل الحاضر عن المسؤولية يتولى المستقبل المسؤولية فى الحال حتى مع صغر سن الجيل الذى يجعل مسؤوليته ، وعدم استكمالهم لدراساتهم وتجاربهم مع الواقع ..
انتهى الحكم ..

(تصفيق حاد من جميع الحاضرين)

(أبو الروس يتسم ويحيى
المصفيين)

أحد الحاضرين : احنا بنصفق للمستقبل مش لك ..
رئيس المحكمة : توقف الجلسة على أن يستمر انعقاد
المحكمة في دارالمسئولية ..
(التصفيق يستمر ، وبدأ أعضاء
المحكمة في الخروج) .

المشهد الثانى

(دار المسئولية)

(الجدران من الطين اللبن كيبوت
الفلاحين ، معلق عليها صور وتحف أجنبية
تمثل كل مراحل التاريخ ، وفى ركن من
الدار يوجد زير ماء ومجموعة قفل
قناوى ، وبجانبه ثلاجة كهربائية وفوقها
« ترمس » مما يحفظ به الماء ، والأرض
مفروشة بالحصير البلدى وفوقها قطع
أثاث من طراز لويس الرابع عشر ، وكنبة
اسطنبولى ومقاعد من الخشب والنقش
كالمقاعد التى تستعمل فى المقاهى
البلدية)

(أمر الله أبو الروس يجلس وقد تغير
الزى الذى يلبسه وأصبح جلبابا بلديا مما
يلبسه أثرياء الريف وفوق رأسه طاقيّة
بلديه)

(يقف حول أبو الروس الثلاثة الذين
يحملون معه المسئولية وكانوا متهمين معه
وقد تغير شكل كل منهم)

(عبد السميع أبو العينين ، أصبح
الرأس الذى يحمله فوق كتفيه ليس فيه إلا
عينان اثنتان وأذنان اثنتان) ..

(عبد العليم أبو جهل قطع لسانه
الطويل ولم يعد له إلا لسان تبرز حافته من
شفتيه وقد أخفى الميكروفون الذى كان
يعلقه على صدره ، وأصبح يمسك فى يده
قلما طويلا ورزمة من الأوراق البيضاء) .
(عبد القوى قوى يلبس لباس شيخ

الخفراء ولكنه لا يحمل سلاحا ، بل
يحمل كتابا ضخما) .

(الثلاثة يبدو عليهم التعاسة والسخط ،
وأبو الروس يجلس وعلى شفثيه ابتسامة
ضعيفة خبيثة كأنه يخفى بها ذكاهه) .

عبد السميع : أنا خلاص .. ما بقتش اسمع ولا اشوف ..

أنا وأى فلاح ما يساويش بقينا زى بعض ، ما
اشوفش إلا اللي يشوفه ولا اسمعش إلا اللي
بيسمعه .

أبو الروس : بس الناس اتغيرت يا عبد السميع .. دلوقت

الناس بتتكلم على كيفها ، وتعمل اللي هي
عايزاه .. تبقى مش محتاجة لأكثر من عينين
اتنين وودنين اتنين علشان تعرف بيقلوا إيه
وبيعملوا إيه .

عبد السميع : مش ممكن .. الناس مهما ادينا لها حرية

الكلام حايفضل فيه كلام ما نسمعوش ..

كلام في السر .. وتحركات في السر ..
وسيادتلك عارف كده بس بقيت بتخبي ..
زمان الناس كانت هي اللي تخبي .. دلوقت
الحكام همه اللي بيخبوا ..

أبو جهل : يخبو ولا ما يخبوش .. أنا خلاص مابقاليش
صوت .. قال إيه اللي اقوله لازم أكتبه ..
أكتب لمين .. أكتب لناس ما تعرفش
تقرا ..

أبو الروس : لازم تكتب .. علشان اللي تقوله وتكتبه
يتحسب عليك .. يسجل في خزينة
المستقبل ..

أبو جهل : أنا مالي ومال المستقبل .. وإيه عرفنى
بالمستقبل .. الناس بتتكلم ولازم الحاكم
يبقى له واحد يتكلم بصوت أعلى من صوت
كل الناس .. واللى صوته يعلى عن صوت
الحاكم .. يعنى عن صوتى .. نقطع

لسانه .. إنما لسانى أنا اللى انقطع ..
وسيادتك راضى وساكت .. صدقتى أنا
نخايف عليك وعلى نفسى ..

أبو الروس : (مبتسما فى مرارة) : ما تخافش ..
اطمن ..

عبد القوى قوى : وأنا قال إيه لازم اعيش بين صفحات
كتاب .. كتاب الدستور والقانون
الجنائى ، والتخطيط البوليسى
والعسكرى .. أعمل إيه بده كله .. دى
كانت البندقية فوق كتفى هى الدستور ..
وكان الخنجر اللى اعلقه فى وسطى هو
القانون ، وكانت مشيتى فى البلد هى
لوحتها الخطة اللى بافرض بيها اللى أنا
عايزه .. دلوقتى نخلص .. راحت عليك يا
عبد القوى .. يعنى لو واحد من الأهالى
حط سكينه على رقبتي لازم أترجاه انه

يستنى على شوية قبل ما يخلص على ، لغاية
ما اشوف الدستور والقانون يقولوا إيه ..
البلاد اللي حوالينا كلها بقت بتضحك
علينا ، وانا من يوم حكاية المستقبل دى وانا
ما اقدرش أسيب بلدنا .. انكسف اوصل
لغاية السكة الزراعية .. كل ما حد يفوت
على ويشوفنى شايل كتاب يسخسخ من
الضحك .. خلاص .. لم تعد لنا قيمة فى
المديرية ..

أبو الروس : مش كده يا عبد القوى .. احنا اترقينا ..
الدستور والقانون زى ما بيعحموا الناس من
الحاكم بيعحموا الحاكم من الناس .. يعنى
يعحموا الناس منك وبيحموك من الناس ..
والتخطيط يعنى تفكر قبل ما تضرب ..
ومن يوم ما ابتدينا تفكر ما ضربناش .. ما
غاطناش .. إنما لو حد غلط فى حقنا

التخطيط بيقول لك اضرب .. الناس ما
بتضحكش علينا يا عبد القوى .. الناس
بقت مطمئنة لنا علشان كده بتضحك لما
تشوفنا بعد ما كانت بتشتبنا ولا تجرى من
قدامنا علشان خايقة منا ..

عبد السميع : وآخرتها .. يعنى كلها سنة أو اتنين ويبقى

اللى بيسموهم المستقبل هم اللى ماسكين
البلد .. ونروح احنا فى داهية .. يقعدونا
فى بيوتنا زى الفراخ ..

(أبو الروس يكفهر وجهه ويلقى رأسه
على كتفه وهو يتهد فى أسى)

أبو الروس : ده صحيح ..

(فترة صمت والثلاثة ينظرون إلى أبو

الروس) .

عبد السميع : (فى صوت خفيض) تسمح لى سيادتك

اقترح خطة ..

- أبو الروس : اقترح يا عبد السميع ..
- عبد السميع : انت بتعزم الثلاثة بتوع المستقبل كل يوم
على الغدا بعد انتهاء اجتماع لجنة
التخطيط .. خلاص .. يتغدو ولا يقوموش
من الغدا الا على القبر .. الولية ام قويق
عندها حنة تنحط على الفطيرة ، وهى
الحنة .. اول ما تقرب على اللسان يبقى
اللسان وصاحبه فى رحمه الله .
- أبو الروس : (ساخرا) الكلام ده ما بقاش ينفع اليومين
دول يا عبد السميع .. ده كان زمان .. أيام
محمد على والمماليك لما دعاهم يتعشوا
عنده ونخلص عليهم ..
- عبد السميع : ومحمد على ماله .. ده وصل بينا
للأناضول ..
- أبو جهل : بلاش دى .. خصوصاً ان الولية ام قويق ما
تسترش .. إنما فيه طريقة تانية .. الثلاثة كل
(لا أستطيع ..)

يوم يتركبوا مركب في التربة .. قال إيه
يلفوا على السواقى .. خلاص .. المركب
غرقت .. واحنا مالناش دعوة ..

عبد القوى : صدقوني .. سيوني عليهم .. رجعوا لى
سلاحى ، ومش حاتلاقوا واحد من بتوع
المستقبل دول له قيمة فى البلد ..

أبو الروس : (فى سخط وقرف) كفاية .. انتم
بتفكروا زى ما تكونوا عايشين فى العصر
الجاهلى .. قلت لكم الكلام ده ما بقاش
ينفع اليومين دول .. الناس خلاص أخذت
على المستقبل يحاكم الحاضر .. يعنى لو
جرى للثلاثة دول حاجة ، حايقسوم
المستقبل ويحاكمنا من جديد ، ومين
عارف حايحكم بإيه .. والمستقبل طول
العمر عايش .. وإذا سكت ما يموتش ..

الثلاثة المسئولون : طيب نعمل ايه ؟ ..

أبو الروس : سيبولي أنا الحكاية دي .. مالكمش دعوة
بيها ولا تفكروا فيها ..
الثلاثة المسئولون: سبنا لك ..

(يدخل الشبان الثلاثة الصغار الذين
تولوا المحاكمة ، ويبدو عليهم الجهد
وآثار الأتربة ، دليلا على أنهم عادوا من
عمل شاق)

(أبو الروس يستقبلهم في احترام
محافظا بشخصيته كاملة محترمة)

(الثلاثة المسئولون يستقبلونهم في
الحناءات كبيرة ، وحركات صارخة من
حركات النفاق)

أبو الروس : صباح الخير يا اولادى ..
الثلاثة : صباح الخير ..
أبو جهل : يا صباح الإشراق على نور التقدم وطلعة
الطموح وجلال المستقبل .

عبد السميع : يا صباح العمل فى سبيل نصره التل
الأخضر ، وسعادة أبنائه ..

عبد القوى : يا صباح الحق والعدل والدستور والقانون
والتخطيط ..

(الثلاثة الصغار لا يردون التحية)

(ترتفع هتافات قوية من الخارج)

— يعيش المستقبل ..

— ابناءؤها هم آماننا ..

— العمل الشاق ولا العودة إلى الوراء ..

(أبو الروس يشير إلى الشبان الثلاثة

ليتقدموا ويحيوا الجماهير من النافذة ..)

(يتقدم الثلاثة وهم يتزاحمون بعضهم

ببعض وكل منهم يحاول أن يصل إلى سور

النافذة . ويصل واحد منهم إلى السور

متوسطا زميليه ويصبح أبرزهم أمام

الجماهير وبعد أن يحيى ، يزيحه زميله

ويقف مكانه ويحيى ، ثم يتقدم الثالث
ويزيح زميليه بكتفه ويقف مكانه
ويحيى .. ثم يعود الثلاثة بعيدا عن
النافذة ، وتسكت الهتافات)

أبو الروس : لقد تعودت الجماهير بعد أن عاشت فيما
حققناه لها أن تفد إلى دار المسؤولية كل يوم
لتحيى المستقبل قبل اجتماع جلسة
التخطيط .. هذا شيء جديد يحدث في
القرية .. والفضل لكم ..

رئيس المحكمة : الفضل لتعاون الحاضر مع المستقبل ..
عضو اليسار : ولكنه وقت عمل .. وهذه الهتافات تشغل
الناس عن العمل ..

عضو اليمين : وقد بدأت ألاحظ أنها تجمعات منظمة ،
وهو ما يشير الشك في أن هناك تنظيما قياديا
لهم ، ولا يفصح عن نفسه .

أبو الروس : الأمر لكم .. ما ترونه نحققه ..

عضو اليسار : نصدر قانونا بعدم التجمع في وقت العمل ..

أبو الروس : يصدر القانون ابتداء من اليوم ..

عضو اليمين : ويجرى البحث والتقصي لمعرفة ما إذا كان هناك تنظيم سرى قائم ..

أبو الروس : عبد السميع .. يبدأ البحث حالا ..

عبد السميع : إن البحث يحتاج إلى عينين وأذنين يضافوا إلى ما عندي ..

عضو اليمين : يسمع له ..

عضو اليسار : لا .. إن الوقت لم يحن بعد للكشف عن التنظيم السرى إذا وجد ..

رئيس المحكمة : ثم إن من حق الناس أن يعبروا عن فرحتهم وتأيدهم لما يحققه المستقبل لهم ..

أبو الروس : احترت .. ماذا تريدون أن أفعل ..

رئيس المحكمة : يؤجل الموضوع إلى وقت آخر حتى نتيح للمحكمة فرصة المداولة .

أبو الروس : يؤجل .. والآن نبدأ الجلسة ..
(يخرج أبو العينين وأبو جهل وعبد
القوى وهم يخطون إلى الورا منحنين في
نفاق كبير)

عضو اليسار : شوف يا انحويا خارجين ازاي ..
عضو اليمين : ما فيش فائدة .. دي عادات قديمة .
رئيس المحكمة : ليست عادات ولكنها شخصية ضعيفة
تحتاج إلى النفاق ..

(أبو الروس .. يسمع هذا الكلام
ويلوى شفثيه قرقا كأنه يعبر عن تفاهة
المستقبل لاهتمامه بهذه الصفات) .
(يجلس الأربعة يتوسطهم أبو
الروس ، وتبدأ الجلسة)

أبو الروس : اسمحوا لي أن أقدم لكم تقريرا عما تحقق
حتى الآن .. لقد حولنا مطعم و برج التل
الأخضر إلى مستشفى ، وعلاوة على ما

حققه المستشفى من رفع المستوى الصحى
لأهل القرية فقد أصبحت له سمعة طيبة فى
المديرية كلها وتوافد عليه المرضى من كل
القرى المجاورة مما ساعد على سد نفقاته
وأىضا حقق فائضا فى الدخل ..

عضو اليسار : يجب تخفيض نفقات العلاج التى يدفعها
المرضى فلسنا فى حاجة إلى هذا الفائض
الذى يعتبر أرباحا نحققها عن طريق
المرض ..

أبو الروس : (ينهته فى سخط) لقد خصصنا هذا
الفائض لافتتاح مدرسة إعدادية فى القرية ..
ولأن الأهالى كانوا يرفضون إرسال أبنائهم
إلى المدارس لأنهم تعودوا أن يرسلوهم
للعمل فى الحقول ويستولوا منهم على
أجورهم ، فقد قررنا أن ندفع لأهل كل
طالب يدخل المدرسة خمسة قروش فى

اليوم لتعويضهم عن الأجر الذي كان يتقاضاه
هذا الطالب نظير العمل في الحقل .. فإذا
استغنينا عن فائض دخل المستشفى فمعنى
هذا أن نقفل المدرسة .

(رئيس المحكمة يتفاوض مع عضو

اليمين وعضو اليسار)

رئيس المحكمة : يؤجل بحث هذا الموضوع .

أبو الروس : وقد استطعنا أن نستغل ساعات العمل التي

وفرها وابدور الحراثة ، بأن شغلنا الرجال في

مصنع لصناعة الحصير وفي مصنع

للسجاد ، معتمدين على إنتاج القرية من

المواد الخام ، كما أننا حققنا مشروعاً قام به

نساء القرية وهو مشروع تصدير الفطير

المشلت بعد أن اكتشفنا طريقة لتصغير

حجم الفطير المعروف وتغليفه ، وبذلك

نجحنا في تصديره إلى المديرية المجاورة

بل إنه بدأ يصل إلى القاهرة ، حتى إنى أفكر
في بدء نشر حملة إعلانات عن فطورنا
المشلتت في الصحف ..

عضو اليسار : لأ .. بلاش إعلانات .. ما حدش يتقرا
الإعلانات الرسمية ..

أبو الروس : بلاش ..

عضو اليمين : بلاش ليه .. دى تخلى الناس كلهم تتكلم
عن التل الأخضر ..

رئيس المحكمة : يؤجل موضوع الإعلانات .

أبو الروس : يؤجل .. وقد كان هناك مشروع إعادة بناء

بيوت الفلاحين بالطوب الأحمر بدلا من
الطمي ، ولكتنا بعد أن وضعنا دراسة طويلة
اشترك فيها ابن القرية الأستاذ الجامعى
محمد محمد محمدين تبين أن الطمي هو
أصلح المواد لبناء القرية المصرية بالنسبة
للمناخ ، وذلك على أن تدخل عليه بعض

الإضافات من مواد البناء ويوضع للبيت
الريفى رسم آخر يحقق مطالب حياة
الفلاح ، وذلك علاوة على أن البناء بالطمي
يكلف أقل من البناء بالطوب بنسبة واحد إلى
خمس ، وقد بدأنا فعلا فى بناء القرية
الجديدة ..

رئيس المحكمة : إننا قررنا اليوم بعد التفتيش على مشروع
إزالة البركة والمستنقع اللذين أضاعا على
البلدة طول عمرها حوالى خمسين فدانا ..
قررنا أننا فى حاجة إلى ماكينة رى ، حتى
نبدأ فى زراعة هذه المساحة ، ويجب أن
نوفر تكاليف شراء هذه الماكينة حتى لو
اضطررنا إلى تأجيل إعادة بناء القرية ..

أبو الروس : (مبتسما ابتسامة كبيرة) هذا سهل ..
ونستطيع أن نشترى الماكينة دون تأجيل
مشروع البناء .. وبالمناسبة اسمحوا لى يا

أبنائي أن أكلمكم بصراحة .. إن الجهد الذي تبذلونه يتطلب أن تكون لكم ركوبة تركيبونها .. ومش معقول أن أخصص لكم ثلاثة حمير لتتقلوا بها ، فالحمير ليست آلات انتقال تتحمل كل هذه الأقدنة التي تشرفون عليها ، واختصار الوقت هو هدف أساسي في بناء المستقبل ، والحمير لا تختصر الوقت ، بل تضاعفه .. وأنتم تعلمون أن القرية كانت تمتلك ثلاث سيارات وقد بعث اثنتين منها لأبدأ بشئها في رصف الشارع الرئيسي في القرية .. والسيارة الباقية لنا لا تكفي كل متطلبات القرية في عصرها الحديث .. لذلك اسمحوا لي أن أعرض عليكم شراء دراجة تخصص لكم .. وليس في هذا إسراف .. إنه من أهم متطلبات العمل ..

عضو اليسار : بسكليت ..
عضو اليمين : الحقيقة لازم نجيب لنا بسكليت .. دواعي
العمل .. ده انا رجالية اتكسرت من
المشاوير ..

رئيس المحكمة : الحقيقة برضه احنا محتاجين لبسكليت ..
بس كنا مكسوفين .. كانت روح التضحية
بذاتنا تتغلب على تقدير متطلبات العمل ..

أبو الروس : وبسكليت بموتور كمان ..
رئيس المحكمة : (في فرحة) بتقول بموتور ..
أبو الروس : شفتها .. وعرضها على الخواجة دوكر
اللى فات علينا من يومين ..

عضو اليسار : يعنى عندك ..
أبو الروس : عندي ..

(يقوم أبو الروس ويخرج إلى
الداخل)

عضو اليمين : أنت تعرف تركيب بسكليت ..

عضو اليسار : طبعاً .. دى نظرية علمية معروفة .

عضو اليمين : نتعلمها ..

رئيس المحكمة : اطمنوا .. ركوبها سهل .

(يدخل أبو الروس وهو يركب دراجة

تسير بالموتور ، ومطلاه باللون الأحمر)

أبو الروس : (وهو يوقف الدراجة وينزل من فوقها)

أدى البسكليت .. هايلة .. ومتينة ..

والراجل سابها لنا هدية ..

عضو اليسار : ورنى ..

رئيس المحكمة : لا استنى .. لازم أستلمها أنا ..

عضو اليمين : لا .. أبندى أنا الأول .. ناخذها من اليمين

لليسار .. العربى كده .

عضو اليسار : انت ما تعرفش عنها حاجة ..

عضو اليمين : أجربها .. وبعدين اقول لك إذا كنت اعرف

ولا ما اعرفش ..

رئيس المحكمة : لا انت ولا هو .. أنا المسعول .. وأنا اللي

اركيها .. بسكليت ولا حمار ، انا اللي
اركب ..

عضو اليسار : دي مالهاش دعوة بالمحكمة .. ما انتش
رئيس على البسكليت .. دي آلة تخضع
لمتطلبات العمل ..

عضو اليمين : أنا أكثر واحد باشتغل فيكم .. ده انا بالف
كل يوم ميت فدان ..

عضو اليسار : أنا صحيح واخذ الناحية العلمية .. إنما لازم
الف على البلد كلها علشان العلم يطبق على
الواقع ..

عضو اليمين : كفاية كلام .. أنا اللي حابتدي ..

(يتقدم عضو اليمين ويشد الدراجة
الحمراء من بين يدي أبو الروس ويتركها
له أبو الروس وهو يتسم ، ثم ينزوي بعيدا
وهو يضع كفه على شفثيه يخفي اتساع
ابتسامته)

(عضو اليمين يركب الدراجة الحمراء ويحاول أن يحرك الموتور ، ثم يحاول أن يتحرك بها ، ولكنه يقع هو والدراجة الحمراء على الأرض)

عضو اليسار : ما قلت لك ما تنفعكش .. انت مش بتاع الحاجات دي .. دي مش بسكليت .. ده تقدم علمي ..

(يخطف عضو اليسار الدراجة ، ويركب فوقها ، ويدير الموتور ، ثم ينطلق بها خارج المسرح)

(يجرى وراءه رئيس المحكمة وعضو اليمين وهما يصيحان) :

عضو اليمين : تعال هنا .. رايع فين ..
رئيس المحكمة : إذا ما رجعتش مش حاسكت لك ..
(أبو الروس يضحك ضحكة عالية ثم يكتمها ، ويخفي شفثيه وراء كفه)

(رئيس المحكمة وعضو اليمين
يقتربان في خطوات غاضبة عصبية من أبو
الروس)

رئيس المحكمة : شوف لك طريقة .. لازم يرجع هنا
حالا ..

(يدخل أحد الخفراء ويحيى أبو
الروس)

الخفير : احنا شفنا عضو اليسار طالع بالبسكليت
على السكة الزراعية .. نسيه ؟

عضو اليمين : (في هلع) ده باين عايز ياخذها لوحدده ..
رئيس المحكمة : (صارخا في وجه أبو الروس) اعمل
حاجة .. لازم يرجع هو والبسكليت ..

أبو الروس : (يصيح مناديا) يا عبد السميع .. يا عبد
القوى ..

(يدخل عبد السميع وعبد القوى
ومعهما أبو جهل)

أبو الروس : اسمع يا عبد السميع تطلع انت وعبد القوى
على السكة الزراعية بالسيارة بتاعتى ..
السيارة بتاعة المسئولية .. وتدور على
عضو اليسار وترجعوه هو والبسكليت ..

عبد القوى : وإذا مارضيش يرجع بالذوق ..

أبو الروس : (موجهها كلامه إلى رئيس المحكمة) لو
مارضيش ؟

رئيس المحكمة : رجعوه بالعافية .. دى مسألة متعلقة بمصير
المستقبل ..

أبو الروس : (لعبد القوى) يرجع بالعافية ..

عبد القوى : (مبتسما) يبقى حايرجع .

(يخرج عبد السميع وعبد القوى
وهما يجريان ، ويحاول أبو جهل أن ينطلق
معهما فيمسك به أبو الروس ويهمس فى
أذنه)

أبو الروس : خليك انت .. لسة ما جاش وقتك ..

(يسود الصمت في القاعة ، ورئيس المحكمة وعضو اليمين يروحان ويجيئان في خطوات عصبية ، وأبو الروس وبجانبه أبو جهل يقفان صامتين وهما يخفيان ابتسامتهما)

عضو اليمين : المستقبل في خطر ..

رئيس المحكمة : مش كفاية اننا نحمى المستقبل من الحاضر ، لازم نحمى المستقبل من المستقبل .. نحميه من نفسه ..

عضو اليمين : أصل كل اللي في إيدينا اننا نقول رأينا بالكلام .. مش كفاية الكلام .

رئيس المحكمة : المؤلف غلطان في تشكيل المحكمة .. ده احنا من يومها واحنا قاعدين نتناقش ونتخانق ..

أبو الروس : (هامسا لأبو جهل) ده الكلام اللي قلته في جلسة المحاكمة وما حدش صدقني ..

(يدخل عبد السميع وعبد القوى
وهما يقبضان على عضو اليسار وغير
يجر معه الدراجة الحمراء)

رئيس المحكمة : (صارخا) سيوه .. إن المستقبل يحرم
القبض على أحد دون محاكمة .. وانت
زى ما تكونوا قبضتم عليه .

(أبو الروس يعطى إشارة لعبد السميع
وعبد القوى ليرلعا أيديهما عن عضو
اليسار)

(يقف المسئولون عن الحاضر بجانب
أبو الروس وهم يحلقون فى شماعة صامتا
لثلاثة المسئولين عن المستقبل)

رئيس المحكمة : كنت فىن ؟

عضو اليسار : كنت راكب بسكليت ..

رئيس المحكمة : وكنت رايح بالسكليت فىن ..

عضو اليسار : كنت بالف على الأرض .

- رئيس المحكمة : لأ .. انت كنت رايع البندر ..
- عضو اليسار : وفيها إيه لما اروح البندر .
- رئيس المحكمة : إن مسئوليتنا تنحصر داخل قرية التل
الأخضر ، مالناش دعوة بالبندر ..
- عضو اليسار : مش ممكن نستغنى عن البندر .. إن العلم
والنظرية والتنظيم .. كل ما يتعلق
بالمستقبل تبدأ دراسته فى البندر ويجب أن
نكون على اتصال به ..
- رئيس المحكمة : يعنى تاخذ أوامرك من هناك ..
- عضو اليسار : ما اسمهاش أوامر .. النظرية العلمية
بتسميها دراسات واستشارات وحوار ..
- رئيس المحكمة : اسمع .. لقد استوليت على الدراجة
الحمراء قبل أن تنتهى المداولة بين أعضاء
المحكمة بشأن تنظيم استغلالها .. ثم إنك
بعد أن استوليت على الدراجة الحمراء
اتجهت بها إلى البندر دون أن تتشاور مع
المسؤولين عن المستقبل .. وكل هذه
اتهامات يمكن أن تحاكم عليها وتعزلك من

هيئة المحكمة .. ولكنى بصفتى رئيسا
للمحكمة سأصرف النظر عن كل ما
حدث .. ولنبدأ فى تنظيم استغلال الدراجة
الحمراء ..

عضو اليسار : أنا أحق من يستعمل هذه الدراجة .. إن
طبيعة عملى مرتبطة بها ..

عضو اليمين : ما حدث يستعملها إلا إذا استعملتها أنا ..

عضو اليسار : أنت ما تعرفش تركيبها ..

عضو اليمين : يبقى ما حدث تانى يركبها الا إذا عرفت
اركبها ..

عضو اليسار : (فى حدة وصراخ) يعنى إيه ؟ يعنى نربط

المستقبل بإمكانية الجهلة .. انت جاهل

ومش ممكن حاتعرف يوم قيمة البسكليت

الحمراء .. ولا تفهم فيها ..

(عضو اليمين يثور ويهجم على عضو

اليسار ، ويضربه بلكمة قوية على وجهه

(وهو يصرخ)

عضو اليمين : أنا جاهل يا بتاع البندر .

(عضو اليسار يرد الضربة بلكمة

أخرى وهو يصرخ)

عضو اليسار : اخرس .. يا بتاع سيدنا نوح ..

(تشتد المعركة بين عضو اليمين

وعضو اليسار ويحاول رئيس المحكمة أن

يتدخل فيضربه عضو اليسار فيشترك رئيس

المحكمة هو الآخر في المعركة ، ويرفع

عضو اليمين الدراجة الحمراء ويحاول أن

يضرب بها عضو اليسار ، فتقع الدراجة

على الأرض وتتحطم)

(أبو الروس والمسئولون معه لا

يتدخلون في المعركة ، ويقفون صامتين

وابتساماتهم تتسع)

(تشتد المعركة إلى أن يقع الثلاثة

الذين يمثلون المستقبل ، على الأرض ،
وهم جرحى ومغمى عليهم)

(أبو الروس يضحك ضحكة كبيرة ..
ها .. ها .. ها .. ويشاركه الضحك
جميع المسئولين معه)

أبو الروس : قلت لكم سيولى أنا المشكلة .. آدينى
حلتها .. خلاص اطمنوا .. ما فيش خوف
علينا .. ها .. ها .. ها ..

(تنطلق ضحكات الحاضر ، ويعود
لسان أبو جهل يطول ويمتد فوق صدره
ويخرج من تحت جلاببه الميكروفون
ويعلقه حول رقبته ، ويرتفع الرأس الذى
يحملة عبد السميع على كتفيه ويصبح له
ست عيون وست آذان ، ويشد عبد القوى
البندقية من تحت معطفه ويعلقها فوق كتفه
ويخرج الخنجر من جيبه ويربطه حول

وسطه) .

أبو الروس : (مشيرا إلى شباب المستقبل الملقى على

الأرض) شيلوهم من هنا .. خدوهم

المستشفى .. مستشفى التل الأخضر ..

ويوم ما يخرجوا من المستشفى نبتدي

نشوب حل تانى .. وفكرة تانية .. ها ..

ها .. ها ..

(تتجاوب الضحكات عالية في كل

جوانب المسرح)

المشهد الثالث

(ممثل التاريخ يخرج أمام الستار ويواجه
جمهور المتفرجين وهو يتسم ابتسامة
كبيرة)

: سيداتي آنساتي أطفالى سادتى .. المؤلف
يطلب منى كل ليلة إنى أقول كلمة ..
وساينى أختار الكلمة اللى أقولها .. وكل
ليلة بأقول كلمة تختلف عن الكلمة اللى
قلتها قبلها .. التاريخ ليس مؤلفا ، إنه
يسجل .. والمسرحية اللى شفتوها الليلة
دى ليست هى المسرحية اللى اتعرضت ليلة
امبارح .. كل ليلة مسرحية شكل تانى ..
يمكن الممثلين ما يتغيروش كثير إنما

التاريخ

الموضوع يتغير .. وانا الكلمة اللي
حاقولها الليلة صادرة عن حكمتي أو
إحساسي بالتفاوتل .. أنا متفائل ..

(مهمة بين المتفرجين)

: مندهشين ليه ؟- هو المؤلف عايز يقول
إيه .. عايز يقول إيه .. عايز يقول ان فيه
معركة بين المستقبل والحاضر .. ومعركة
تانية بين المستقبل بعضه وبعض .. وماله ..
المؤلف ما جنبش جديد .. هذا هو الواقع
منذ وجدت الدنيا ووجد فوقها الإنسان ..
سيدنا آدم من يوم ما اتوجد خالف ربنا
علشان تفاحة .. وطرده ربنا ونزله
الأرض .. وبعدها سيدنا آدم خلف اتنين .
اتنين بس .. هابيل وقايل . كانوا هم
الاتنين يملكوا الدنيا كلها ورغم كده
اختلفوا .. واتخانقوا .. إنما التفاحة بتاعة

التاريخ

ابوهم بقت حاجة تانية .. ومن يومها وكل
الناس ما يكثر عددها في الدنيا الاخلاقات
تكثر ، الخناقات تكثر .. والتفاحة في كل
خناقة تبقى حاجة تانية .. مرة تبقى في
شكل ملك ، ومرة تبقى في شكل رئيس
جمهورية ، ومرة تبقى وزراء ، ومرة تبقى
حقة أرض ، ومرة تبقى شركة تجارية ،
ومرة تبقى سيارة ، ومرة تبقى موتوسكل ،
ومرة تبقى مجرد بسكليت .. إنما أحب
اقول لكم ، وانا اللي شفنت بنفسى الإنسانية
منذ وجدت الإنسانية .. أحب أقول لكم انه
لولا الخناقات دى كان زمانكم لسة عايشين
عريانين بتاكلوا اللي تلاقوه زى ما كان
سيدنا آدم عايش .. ده حتى يمكن ربنا هو
اللى ترك سيدنا آدم يخالفه علشان يعود
أبناءه على الخلاف والخناق .. علشان

يضع الخلافات والخناقات في طبيعة الإنسان ، ولأن هي الحافز والوسيلة لدفع الإنسان إلى التقدم .. صدقوني .. اللي بيتخانق لازم يدفع حاجة من نفسه علشان يكسب الخناقة .. طبعا فيه ناس يدفعوا فلوس علشان يغرو الناس الثانية بأنها تقف معاهم في الخناقة . بس كمان فيه ناس بتدفع أفكار جديدة .. ومشاريع جديدة وأنظمة جديدة . هو ده النوع من الخناقات والخلافات والمعارك اللي تخلى الإنسانية تتقدم .. وتتقدم .. وتتقدم .. تعرفوا تفضل تتقدم لغاية فين وإمتى ؟ لغاية ربنا ما يلاقى الناس خلاص ، اكتمل ببيانها ولم تعد في حاجة إلى معارك وخلافات تتقدم بها نحو الأفضل .. يومها ربنا حايفير طبيعة آدم ويرجعه الجنة .. يعنى كلنا نرجع نعيش في

الجنة ..

(أحد المتفرجين يقوم ويهم
بالانصراف)

التاريخ

: خليك قاعد .. ماحدث بيعد عنى .. أنا
قلت لكم انكم مش متفرجين على دنيتي إنما
انتم عايشين فيها . المسرحية دي
مستمرة .. مستمرة إلى الأبد .. المؤلف
ترك جيل المستقبل يدخل المستشفى ..
وماله ؟ فى كل المراحل اللي مرت على
كان المستقبل محتاج انه يدخل
المستشفى .. ومش معنى كده اننا نسيب
الحاضر يشتغل لوحده .. لأ .. لازم نفضل
مر كزين عيوننا وعقولنا عليه علشان يحسب
حسابنا ويخاف منا ويتقدم بينا على قد ما
يقدر ، وعلى قد عقله .. وبعد شوية
حايخرج جيل المستقبل من المستشفى ..

حايخرج سليم .. وحا يكون اتعلم وأخذ
درس .. وتبتدى الخناقات من جديد ..
تبتدى معركة تقدم الإنسان ..

(يزيج التاريخ حافة الستار ويهم
بالدخول خلفه)

: عن إذنكم .. لازم ادخل اطمئن على صحة
المستقبل ..

التاريخ

نهاية

رقم الإيداع ٣٤٣٥

الترقيم الدولي ٢ - ٥٨ - ٧٠٩ - ٩٧٧

مكتبة مصر
٣ شارع كامل صدقي - النجيلة

726
55

Bibliotheca Alexandrina



0344903

الشمس

دار مصر للطباعة

سعيد جودة السحار وشركاه